

# AISAYA

Buku dake akali Aisaya lenge dokome baa poropeta akali andake ee kana 750 W.K. epo papeyamopa karo pyuo 700 W.K. ee kana dopale yuu Jerusalem dokona pii lao kareya. Buku dakena pii mendaki palipyamopape pii wakale rema liti pisi pyasi palamo.

1. *Rombo 1–39* Juu wambunya iso karenge yuu Juta lenge doko Asiria wambu dupwame pyalana pyuo kareyaminyi dokopa Aisayame pii lamaiyuo kareya. Aisaya baame kando Juu wambu dupwana randa angi doko Asiria wambu porayami renge doko daa lao siya. Juu wambunya randa angi doko Anatu leyamuli pyuo pii napala kamba lao kapa pira lao suu pyaa nayaminyi doko lao Aisayame soo gisiya. Renge dusipa wambu dupwa sinyu lao Aisayame pii au pyuo lao kongwalu dupwa lasaka pyuo pyuo kareya. Pyuo kareyamo dokopa mee wambu dupwape nakamana iso karenge akalipi yulu rolae pyuo kote rolae lao pyuo karalapape lao lamaiya. Anatu laramuli pyuo nakama soo pii narami ramo doko kokwa soo randa nyuo pyuo kararami lao repe repe lamaiyuo kareya. Repe repe lapala yuu rakyame dokopa yuu muu dupwana wambu dupwa peparae lambo lao mona kyuu lao sera dokopa kini akali mende kini Dapitinya rara dokonandeme epo au pyuo yulu rolae pyulu pyuo pira doko eparamo pii doko Aisayame nolako leya.

2. *Rombo 40–55* Juu wambu dupwana malu mee yuu wakaleBabilone lenge dokona anamasi miniyaminyi dupwame lanyuo peyaminyi dokopa kondome kumuo kareyaminyi dokona lao pyasi palamo. Yuu gii dokopa Anatu baame banya wambu dupwa mokwalana karamano rengya usale mokwaramo dokopa banya wambu dupwa nakama rangena yuu Jerusaleme dokona kamba lanyuo paramo waili pii doko poropeta akali dokome poraiyuo lamaiyuo kareya.

Rombo dasipana renge mende pyasi palamo. Palamo doko Anatu baame ee kana epapa papa piyamopa rapa rapa pyuo iso karalu karo karamo. Banya wambu dupwa nakamame wambu wakale wakale dupwa peparae Anatunya waili pii keyange doko maiyuo lamairaminyi doko Anatumi rapa rapa pinya pilyamo. Dopa pipyamosa wambu wakale wakale dupwa Juu wambu keta au pirami. Pii dakena Anatunya kendemande akali dokona lao palamoko. Pii doko Ole Tesamene dokona wambu dupwame pii lapo ama wakasa rungi rungi pisingi

dokona mende doko pii dake. Rombo 53 dokona randa andake nyuo giyalya giyana pyuo kilya kando laminyipa Anatunya Kendemande baa kumulyamo lao paleya. Poropeta pii dakena lao Kurisene wambu andareleme Yesu dokona lao leya soo nyilyaminyi.

3. *Rombo 56–66* Juu wambu lapo yuu Jerusaleme doko yaki nyii nayaminyipape mona kendo kareyaminyi dokona Anatumi leymuli pyuo pira dokona lao mona kyuu lao sinya lao waili pii dakena pepa piya. Nakama Anatunya mawa pii dupwa pyuo minyuo kote rolae lao karalapape lao misi lenge yuu gii dokopa Anatu lakando mena pyao kiso maiyuo atenja lenge yulu dusipa kame see nao minyarama lao pyasi palamo. Rombo 61:1-2 dokona pii mupwa mende Yesu baame kanda soo mana lao kareyamo dokopa banya yulu dokona lao mana lao karo leya doko palamo.

**1** <sup>1</sup>Buku dakeme Juta wambu Jerusaleme paleyami dupwana lao kiŋi Usaya Jotame Easa Esekaya kiŋi yulu pyuo kareyami dokopa Anatumi poropeta Aisaya Emosena ikinyingi keta epo leyamo dokona lasi silyamo.

### Anatumi Banya Wambu Kando Esipyao Pii Leya

<sup>2</sup>Kamongome lao, Yake yuupa dolapona nambame pii leto doko apa pyuo leene lao serambi, leya. Wane wanakepe nambame manju andanyi pyambwapu dupwame namba yanda pimwailiyaminyi. <sup>3</sup>Bulamakaome otange minyingsi range ai singi. Dee mena donge dupwame nenge maingsi mare doko soo gisingi. Menana yulu doko nyuo isa palyuo Isaraele wambu dupwame namba keta piramili doko kaelyaminyi.<sup>a</sup>

<sup>4</sup>Nakama mena kuiyalana pilyaminyi anda epenge dopale ingyuo karaminyi. Nakama yuu dakena wambu dupwa mona pali napyamo koono para pyasi wambu ingyuo pelyaminyi. Embena Isaraele wambunya Kamongo Poo Pyasi Anatu doko embame mata maiyuo kaelene. Koo pilini dokome emba nyuo isa pyakalopyamolamo lao silyu. <sup>5</sup>Isaraele akipamo embame yanda pimwaiyuo puu pelepe. Emba dee kamba yasu kee letepe? Isaraele embena kyawa dorena wua kakupi nyuo pisapala mona suu pingipi dorena kumapyamo karene. <sup>6</sup>Embena yanenge peparae mendasa iki sepa nao kwaelyamo. Mendasa yaki pyuo umbwa pyuo nyisi kara nalyaminyi, leya.

<sup>7</sup>Nakamana yuu doko kokwa soo dee taone dupwa lalyasi silyamo. Rara wakale wambu dupwa epo nakamame mee lenge makando pipala kaelyaminyisa epo nakamana yuu nyepakala bange singi dupwa ukiaki

<sup>a</sup> **1:3** Isaraele embena kyawa dorena wua kakupi nyuo pisapala mona suupingipi dorena kumapyamo karene. (1:5)

minyuo apa nelyaminyi. <sup>8</sup>Jerusaleme yuu taone doko iki yanda pimwai lenge lenge raminyipa ropeta ee kame piro kara nange dokona iso karengge akalinya anda kauwa ingyaro silyamo, leya. <sup>9</sup>Kamongo Porai Wakasa dokome apa pilyaminyi lao kata kandala pena lao laa nayali doko Jerusaleme mende yapa rongge nyii nao yuu Sotoma Gomorapana piyamo dopale ingyuo pupyali.

<sup>10</sup>Jerusaleme akali kanjili komiti lowa minyingsi dee nakamana wambupi dupwa yuu Sotoma Gomora wambu peteyaminyi dopaleko ingyuo pelyaminyi. Dupwa Kamongome nakama kando apa langilyamo lao selapa. Banya mana letamo dokona doko mende lalyamo lao wangu lakapala selapape. <sup>11</sup>Baame lao dokopa nakamame rendamu pingi namba kaeya nao kiso jilyaminyi dupwana namba kyanyi kandakalene lao suu pilyamipi? letamo. Namba nakamana mena sipisipi dee mee mena bulamakaope akipi keyange kapako namba kiso jilyaminyi dusipana deyako yano pipyamo kara nalyo. Mena sipisipi bulamakao memepena ranjama jilyaminyi dusipa epapu namba nombe nombe petamo.

<sup>12</sup>Apimi tembole anda dokona nambana lao kingi wapambupi lakao pisinya dokopa bange dupwa minyakao wamya lyuo ipupwa lao lapyasa epelyape? <sup>13</sup>Nakamame kiso jilyaminyi doko mee ingyuo pelyamo. Nakamana saa yakape kiso jiminyi rendamu dokome namba nyiki nyiki pipyamo karo. Nakamana Satate Kukinyape dee kana enengena nenge malu palyuo nenge nengepe dee malu palyuo andake tembole mitinji lengepe dupwa nakamana koo dupwame mendena ketae ingyuo pupyasa soo rae maiyaka nalyo. <sup>14</sup>Dopako pyuo nakamana kana enengena nenge malu palyuo naminyipape dee yuu gii poo pyasi lao nyilyamano laminyipape dupwame namba kenda jimisa selana rae mai nalyo, leya.

<sup>15</sup>Embame kingi ketae pyambwapala atenja larene dokopa nambame lengeme emba kandalena eeya lara. Atenja malu lare panda akipare lare dusipana namba mende saka naro ingilyamo. Renge doko emba kingi ranjamako dokome karo larenesa dokona yaka laka naro ingilyamo.

<sup>16</sup>Nakama range wate pyuokondali pipala rolae ingyuo seramo karalapape. Renge koo nakama pipya nambana lenge kambu sipyamo darena silyamo dusipa ramanyi nembapala <sup>17</sup>yulu keyange dupwa mana nyuo pimwali lao pipwape. Kote dokona rolo lalapape. Randa nyilyaminyi dupwa nyisalapape. Wane wanake muiyane enda waiya dupwape bange dupwa nyiso rungi pyapeta sakaminyi lao karalapape.

<sup>18</sup>Kamongome dopa letamo. Dakepa kwaelyamo dupwana rolo lamanale. Nakama koo dokome ranga yuku napyasa koo pilyaminyi dopa pilyaminyiko doŋo dopa piraminyipape nambame nakamana koo dupwa wate pyuo kewa lanyi nembakaronopa maa bilima kapa ingyuo kewa lao rao karenale. Nakamana koo dupwa kamame pingi pyao silyamo doko kaepala kwuala pao kewa lenale. <sup>19</sup>Nambame laro dokona iki warombo

soo pyuo larami ramo doko yuunya ando eparamo amenge kapape doko kapa nao kararami. <sup>20</sup>Kaepala sili nasili lao soo nembo larami ramo wua nenge dokome yasuko nao kumarami lao namba Kamongo dokome dopa lapyanja lalapape.

### Koo Renge Singi Taone Mende

<sup>21</sup>Taone mona kare kare mondo lao piyami kande doko epapu pundange lenge kambupi niyaminyi. Wamba kandeyo dokopa yulu keyange rolae dokome simbwaro siya. Dopa piyamopape epapu dakepa wambunya ranjama nenge yeelyo karaminyi, leya. <sup>22</sup>Jerusaleme emba wamba kana kulingi kulisa palengena mendekepe dee ipwa waene yapasinya mendeke ingyuoepo karale kandale doko kaepala dakepa mee mendena ketae ingyuo pelene, leya. <sup>23</sup>Nakamanana lita akali dupwa mendale isa palyili palyili lao waa nyingi dupwana puu kulisa ingyaminyi. Nakama karena lakaro bange sinya lao diriki pyuo nyuo lao karaminyi. Dopako pyuo dee muiyane wambu enda waiyape dupwana mojo ipyamo minyuo kotena iminyi dupwa mondo lao lakami nalyaminyi. <sup>24</sup>Dokona lao dakepa Anatu Isaraele wambunya Kamongo Porai Wakasa dokome apa letamo lao selapa. Nambana yanda pimwai dupwa nakamana koo dupwana bekeme pyakaronopa dokona nakamame namba isingi randa dee jeraminde daa lao silyu. <sup>25</sup>Nambame epapu nakama angi pyaro. Nambame nakama akalimi kana kisalamuli pyuo kiso kwaelyamo dupwa nembo wasaronopa angi doko randa dokome lili pyuo yapalyara, leya. <sup>26</sup>Nambame nakama akali kyawa wamba kareyami dopale lapope mende pinya dokopa banya pii sepala piyami dopale lapope wakale jero. Dopa pirunu dokopa Jerusaleme taone doko taone keyange yulu mondo lao piminyi rolae silyamo lao larami ingyara.

<sup>27</sup>Kamongo baa rolaena renge palenge dokome koo dupwa koo dupwa kondarami dokopa Jerusaleme doko pyuo elyape keta pisara ingyamo. <sup>28</sup>Dopa pyuoko dee mendeme baapa yanda pimwairaminyi dupwa minyuo poo poo lao pyanyi reto banya kingi dokona yaki nyeramo wambu doko pyao kumakao pira ingyamo.

<sup>29</sup>Dopa piramo dokopa isako waingi kemali pingi lapo wara pipalape isa renge kemali pingi laponape moname nyinyi nembo kingi lao petenge lamo dupwa yamarangyuo yaki nyuo kaeyarami ingyamo, leya. <sup>30</sup>Nakama yuu kulisa dokopa kapywa waingi ipwa pyaa nalyamo yando nalamuli pyuoee ee waingi neta kone dokona ipwa yangyuo yando nalamuli pyuo soo parami, leya. <sup>31</sup>Yuu anda piro singi dokona isare kainyi palyingi dokopa mendeme minyara nange kandale. Doko suu pyao akali ama porai ingyuo karo koo pyuo karaminyi dupwa yulu koo dokome nakama nyuo orambo palyuo kokwa seramo dokopa mendeme nyisalana saka narami.

**Mona Kyuu Lao Singi Renge Doko Sulu Sera**

(Mae 4:1-3)

**2** <sup>1</sup>Pii dake Anatumi Juta wambu Jerusaleme paleyami dupwana lao Aisaya Emose ikinyingi doko lamaiya.

<sup>2</sup>Yuu gii mende pyaka sera ingyamo dokopa tembole anda karamo yuu kyau dokome dokopa yuu kyau doloma nyuo isa palyuo sera ingyara. Seramo dokona yuu muu doloma mee kaeya nao ipwa ingyuo kulimbwanyi peeyo epo karalu kararami ingyara.

<sup>3</sup>Yuu dupwana wambu dupwame lao dokopa Isaraele wambunya Kamongo Anatunya yuu kyau tembole anda dokona monako lao parami ingyara. Namwa baame apa pimili lao suu pilyamo dokona mana nyuo baame kata parama doko wapwakao otapya dokona pao pimanale. Kamongona mana pii doko yuu Jerusaleme dokona piso epara yuu Sayone dokona piso banya wambu dupwa lamailyamo.

<sup>4</sup>Baame yuu muu andake dupwana apiyanda pyuo lao kararami dupwa kooso karena lao rolara. Nakamana wua gela dupwa yanda kaepala yuu apu renge ane isa ingyuo wasarami. Nakamana kaku dupwame kope pyakepenge wua ingyuo wasarami. Yuu muu andake dupwa dee yanda pela pelyamano lao paminyili pyuo paa nao dee yanda pingya mata wara pyuo karo puminyili pyuo paraminde daa.

<sup>5</sup>Dakapa Jekopena para piyamo dupwa Kamongona kata yalu pii napala ena pasi silyamo dokona papyuo pyuo karo pimanale ipupwa.<sup>b</sup>

**Isa Girapo Ee Dokona Lao Kenane Doko**

**5** <sup>1</sup>Nambana mona retenge dokona suu pyaa. Mona retenge kenane dokome banya girapo ee dokona pyao ranaisa poko pyarowale.

Nambana mona dokome banya girapo ee doko yuu mandarena rummyasi keyange dokona wara pipala kareng

<sup>2</sup>Baame kana dupwa nyuo kakondao yuu ape ape pyao pingi. Dopa pipala baame girapo keyange wingi dupwa wara pingi.

---

<sup>b</sup> 2:6–4:6 Wambu namwa ketaele ingyuo karamano lao suu pingipi koo pingipi dupwa Anatumi kote lara. Dopa piramopape wambu lete kararaminyi dupwa Anatumi nakama wate pyuo enenge ingyini pyambwakaro lao lalu lao leya.

Baame girapo kingyaramo yuwale dupwa kyaso  
dee anda kama dululi pipala isaro karara anda doko pipala  
girapo poo relyape lao isaro karengé.

Dopa pipyamopape girapo peparae kau pingi aiyange dupwa lyepa  
piya.<sup>c</sup>

<sup>3</sup>Dokona lao Juta Jerusaleme palenge wambu nakamame namba mende  
pii napusa pilyape panda girapo ee baame pilyape lao soo kandapala  
lalapape. <sup>4</sup>Nambame piruli mende kaeyapala namba isa pupunusa  
pilyape? Dopa pyuo isa paa naronde ramo doko akipamo keyange lyera  
lao kandaro karapunu kata dokona kau pingi aiyange doko yapo lyilyape?

<sup>5</sup>Nambame piru doko dapa pyuo pirunu kandalapale. Doko kame  
maronge dupwa lalyuo asu pinyi nembapala kame angi suwa menape  
kame piro karena lao piyu dupwa lalyinyi nembo mena rakaiye wii saape  
kame lalyuo nyuo pirunupa nao mena gulungalu lao karenale. <sup>6</sup>Ranome  
ando girapo anamasi minyinya laro lao dokopa pyakepanyi nembo  
yuu kapu kyo pii naro. Dopa pingi kandale doko suu pyao nepereke  
ikyaikyape pulyinya lao piru. Namba kopa dokome apu kata mai nana lao  
lamairu.

<sup>7</sup>Israele wambu dupwa Kamongo Porai Wakasana isa girapo ee  
mendeke ingyuo serenge.

Juta wambu dupwa girapo angi baame warapiyamo andenge dopale.  
Dokome baame nakama keyange pimili lao suu piyamo dokona  
palyuo pyuo kara napala wambu pungu yando nao kwaeyami.  
Rolae karamili lao suu piya dokona palya napala  
mendeme mendali nyuo isa palyalanako suu pyao piyaminyi dokome  
range mende pyao isa palyingi dokopa kote rolae lakanako lao  
minyuo pao karengé.<sup>d</sup>

### Anatumi Aisaya Poropeta Akali Ingyuo Karena Lao Kee Leya

**6** <sup>1</sup>Ee kana kinji Usaya kumuyamo dokopa Kamongo doko kandeyo.  
Baa kinjinya petenge isa dokona mupwa ingyuo peteyamo dokopa  
banya komau londe dokome tembole anda panda dokona soo simbwaya.  
<sup>2</sup>Baa peteya dokona lee renge bange lapo karo awali leyaminyi kandeyo.  
Dusipana mendaki mendaki lao range dokona papake pakinyamange  
karapa piyamo kareyaminyi kandeyo. Lee renge bange mendaki dokome  
rangena papake pakinyamange dokona lamame nyuo lenge kambu yambe  
pyao lamame nyuo yanenge dokona yambe pyao lamame nyuo bii lao  
pao pipa peyaminyi kandeyo. <sup>3</sup>Nakama range yango sukusa pii lao alowa  
pyuo lao,

<sup>c</sup> 5:2 Isa girapo ee dokona lao kenane doko. (5:1-2) <sup>d</sup> 5:8-30 Wambu yulu koo wakale  
wakale pingi dupwa keta randa epenge.

Poo pyasi, poo pyasi, poo pyasi,  
Kamongo Porai Wakasa doko poo pyasi.

Banya neta renge yulu dokome yuu muu dupwana soo kapa kapa pinyale leyami.

<sup>4</sup>Pii poporambaiye dokome tembole anda doko minyuo pyuku pyuku lapala isare kyau lao rali piya.

<sup>5</sup>Dopa piyasa namba kumuo kaeyalyano lao mee kikurenge doko kareyo. Karo suu pyao, Nambame kambunya pii epenge dupwa karo petenge dupwako epenge dokoŋo dee wambu pii koo kambunya lao piso palyuo piminyi dupwa pipya piso palyuo pyuo karenge. Dopa pyuo karapunupape nambana lenge angi dokome Kamongo Porai Wakasa Kiŋi doko angi kandelyo lao suu piyu.

<sup>6</sup>Dokopa lenge renge bange dokona mende namba kareyo dokona petakareme isarena kana pyare lasinya kiso maingi dokona isa lengya mende rapo nyiyande minyuo epeya. <sup>7</sup>Epapala isa lengya rao siya dokome nambana kambu dokona warendapala lao dakepa embena koo dupwa pupyamopa nyuo kame sakao kaeyasi silyamo, leya. <sup>8</sup>Enakana Kamongome lalyiyamo siyunupa lao, Api mendali mapanyi nembarope? Apimi mendeme nambana pii minyakao parape? leyamo siyu.

Sepala nambame baa lamaiyuo, Namba parowale. Nembena, leyo.

<sup>9</sup>Dokopa namba pao wambu dupwa pii dake lamaiyape, leya. Kamame malu soo kararaminyipape angi doko soo rola narami. Kamame malu kando kararaminyipape angi doko apa pipala pilyamo lao angi kando gisapa narami, leya. <sup>10</sup>Lapala namba langyuo, Nakama lengeme kando kaleme soo suu pinginya soo manji nyuo kara narami lao wambu dusipana suu pingi kendanyi nembo kale kata poeyanyi nembo lenge iminjinyi pyambuo karape. Nakama soo manji nyuo karamili mona kapu kyimili dokome namba pyuo nyipuli, leya.

<sup>11</sup>Dokopa nambame baa piso soo, Kamongo yuu gii akipare dopale ingyuo serape? leyo.

Baame isingi langyuo, Yuu taone andake dupwa kwaeyo alowa pyuo iki sero dee anda dupwa pii karo dee yuu angi doko muiyane ingyuo soo piramo dokopa lalono dopale pira, leya. <sup>12</sup>Nambame wambu dupwa nanesa nembapala yuu doko peparae apa sinya lao piru, leya. <sup>13</sup>Wambu akalisa dokona doloma pena lapala mendaki karo kaeyara ramo doko isa kapyia angi doko poko mapu pipala angalu doko yaki nyilyaminyi doloma rapala ralamuli pyuo kokwa soo para.

(Isa yanengena kongwalu pii doko Anatumi banya wambu keta yulu enenge pyakamira dokona letamo.)

### Kiŋi Easa Kando Pii Epeya Doko

**7** <sup>1</sup>Yuu gii kiŋi Easa Jotamena ikinyingi Usayana kauwange doko Juta wambunya kiŋi yulu pyuo kareyamo dokopa yanda andake

sipureya. Siria wambunya kiñi Oresenepa Isaraele wambunya kiñi Peka Oremalayana ikinyingi dokopame Jerusaleme pyala epapeyambinyipa kapa ingya nao mee pepe piyambi.

<sup>2</sup>Juta wambunya kiñi dokome siyamo dokopa Siria wambunya ami dupwame Isaraele wambunya yuu dorena pyala epelyaminyi lamo lao sepala kiñi baa banya wambu pipya pakao minyuo inju ingyuo pyuku pyuku lapala isa kanyinginya peteyami.

<sup>3</sup>Dokopa Kamongome Aisaya lamaiyuo, Embena ikinyi Seanjasupi nyepala lanyuo kiñi Easa karamo dokona puu, leya. Baa ipwa pete dulunya soo suunya minyuo epenge pinjingi dokona komau wasingi dupwa yulu pyuo karengere mare dorena karara kando nyere, leya.

<sup>4</sup>Kiñi doko kando nyepala lenge rao mona seramopa paka nao karena lare, leya. Kiñi Oresene banya Siria wambu dupwape dee kiñi Pekana imbu singi doko mee lyipongona yao isare dopaleje paka nalapape, leya. <sup>5</sup>Siria wambupi Isaraele wambupi pipya dee Isaraelena kiñipi nakambame yulu koo mende pinya lao palyiyami. <sup>6</sup>Nakamame Juta wambu dupwa pyalana pyuo nakama pipa kombani lamana epo role pinya lao lao pakasinyi serapala akali Tapalena ikinyingi doko kiñi karena lao wasalana lao suu pilyaminyi, leya.

<sup>7</sup>Dopa pilyaminyiko doño namba doko Kamongo dokome pano lao doo letaminyi dokona pali nara leto, leya. <sup>8</sup>Akipamo dopa letope? Renge doko Siria wambu dupwa Damasakesa wambu taone mupwa doko manda manja nara. Dee Damasakesa doko baa porai ingya naramopa kiñi Oresene baa poraili ingyuo karamo. Dopa pyuo silyamo dokona Isaraele wambu dupwana lao ee kana 65 paparamo dokopa penge kamba sinyu ipwa pele lapala dusa kata serandena minyuo rali pipala yuu liti doko angingyuo see nara, leya. <sup>9</sup>Isaraele baa Samaria wambupa manda daa. Dee Samaria wambu nakama kiñi Pekana porai dokopa manda manja nalyamoko.

Dokona lao embame kapa ingingi lao suu pingi doko ando puu paa nara ramo dokome emba kapa kara nare ingyara, leya.

### **Imanuele Dokona Lyakai Lapo Piya**

<sup>10</sup>Kamongome dee pii mende Easa keta lamaiya. <sup>11</sup>Doko dopa leya. Embena Kamongo Anatu dokome wambu kumuo penge yuu dorena ingyuwape dee yake ketae dulurena pisowape kongwalu mende pyuo lasaka pinya lao piso sepe, leya.

<sup>12</sup>Dokopa Easame isingi lao, Nambame Kamongo Anatu doko dopale pinya lao piso see naro. Dopako pyuo Kamongo doko makande pyuo kanda naro ingilyamo, leya.

<sup>13</sup>Aisayame pii dokona kando isingi lao, Kiñi Dapitinya para pyasi doko embame dakepa mende pyamo lao sepe. Akalimi iki mali soo karo



makana lao pilini doko iki kapa daanja. Anatu opetaeko mali soo karo makana lao piriko, leya. <sup>14</sup>Dakepa Kamongo baa rangeme emba renye lyakai mende pyuo lasaka piramo doko dopale. Doko enda mapwae mende petamo doko keta wane ingyaramo manjipala dokopa kingi doko Imanuele larami, leya. (Imanuele kingi doko Anatu namwa role pyao karamo dopale.) <sup>15</sup>Wane baa ando mona palyuo range suu pyao pingi mange kandale dokopa wambu dupwa amburali ipwangepe mena anju ipwangepe nao kararami. <sup>16</sup>Yuu gii doko pyaka sepa naramopa akali doo kihi lama dolapome emba paka renye jilyambinyi dolapona yuu doko apa nao kwaeyasi sera, leya.

<sup>17</sup>Kamongo dokome randa mende nyuo emba embena wambu akalyanda dokona pisara ingilyamo. Randa angi doko wamba Isaraele wambu dupwa paka lakyuo Juta ingyuo peyamipya kande dopale ingya napala wakasale epara. Doko baame Asiria kihi doko kame lalyinyi peyara ingilyamo, leya. <sup>18</sup>Dopa piramo mange dokopako Kamongome Isipi wambu dupwa ipwa pona kuki epo Naelena donorena nanesa piso wambena polo epamuli pyuo dee Asiria wambu dupwa amburali polo epamuli pyuo epena lao kongwalu lapo pyuo nyuo peyara, leya. <sup>19</sup>Epo yuu pau lama lama kana pisalya pisana pingi dokonape kana anda imwa isako panda rambipi nepereke kaireke maupi dupwanape epo buu minyinya lao nyuo peyakara, leya.

<sup>20</sup>Yuu gii doko pyaka seramo dokopa Kamongome kyawa rokonge akali Asiria kihi doko yuu Yuporisa dokona oko soo epena lao kyakale lao nyakaronopa dokome epo nakamana kyawasi angasi dee yongo yamanjipi dusipa roko wapya pyanyi nembakara, leya.

<sup>21</sup>Yuu gii doko pyaka seramo dokopa pama akali baa mena bulamakao andanda mendaki mee mena meme lama ingyaramopape <sup>22</sup>anju ipwange soo kaeyo palirasa baa yano pirali dupwana kapa pyuo nao pisirami. Dopa piramopa yuu dokona wambu yaka lengele iki palu kararami dupwame anju ipwange amburali ipwangepe seramo nao pisirami ingyara.

<sup>23</sup>Mange dokopa isa girapo puu marange taosande dokona puu wakale wakale manda manjo kana taosandeko nyingi yuu dupwa rano epale soo ikyaikya mamunypi mau soo kwaeyara, leya. <sup>24</sup>Wambumi dokona pao yanda kakupi soo wii saape pyao nala pao kararami. Kinyi yuu lili doko peparae nepereke kairekepe pulyara, leya. <sup>25</sup>Yuu kyau ee wara pingi dupwa peparaena reke reke isa dupwame ando balo serasa wambu mendepe dusa moko palyuo paa narami, leya. Yuu doko mena sipisipi bulamakaope isako nenge nala pao kararami ingyara, leya.

### Aisayana Ikinyingi Doko Wambu Dupwana Kando Kongwalu Mende Paleya

**8** <sup>1</sup>Kamongome namba langyuo, Pepa yoko kameyali mende nyepala dokona pyao pingi kameya ingyuo pyapala pyao palyape. Pii dake,

Waiya Lao Kokwa Soo Apa Nenge, pyao palyape. <sup>2</sup>Lapala lao akali angi pirambili purisi Yuraya Sekeraya Jeperekayana ikinyingi dolapome usinisi yulu pinya lare, leya.

<sup>3</sup>Yuu gii lapo epo papeyamo dokopa nambana enda doko wane ingiya. Wane manjo nyiyamo dokopa Kamongo dokome langyuo, Banya kingi Waiya Lao Kokwa Soo Apa Nenge lape, leya. <sup>4</sup>Lao dokopa lao, Wane doko ene ando anyi rakane lapa naramo mange dokopa Asiria kiñi dokome Damasakesa wambu Samaria wambupinya yuu dokona epo pyao andambupi nao pyapala apa nao nyuo parami, leya.

### Asiria Kiñi Doko Epelyamo

<sup>5</sup>Kamongome namba deyako langyuo lao, <sup>6</sup>Wambu dapwa ipwa Sailoa elya kalo epenge doko yaki nyuo kaepala kiñi Oresene Pekapa kando walu walu lao karaminyi dokona lao <sup>7</sup>namba Kamongo dokome Asiria wambunya kiñi banya amipi nyinyi peyapala Juta wambu dupwa pyarowale. Namba Kamongo dokome dopa pyuo pyasinya lalopono. Nakamame epo pyao pyaramisa mendepe yapa ronge nyii nao ipwa Yuporisa marongepe mende see nao kama pyao epo penge dopale ingyuo popyamo, leya. <sup>8</sup>Dopa pyuo Juta yuu peparae ipwa lyepala bange peparae yambe pyao epo mange dokona lili pyuo anamasi minyara ingilyamo, leya.

Anatu namwa pipya karamo. Banya papake ketae palyuo pee yuu dake kyawa minyara ingilyamo.

<sup>9</sup>Yuu muu ree lao palyuo pelene dupwape matasa palaminyi dupwape yanda pirami dokona mata wara pyuo karalapape. Doño apa pyuo piramape lao repe repe laowako palyuo pupwape. <sup>10</sup>Rapa rapa pipalape angi pinya laminyi dokona pali nara ingyara. Apa piramape lao nakama nyelana suu pyaraminyi dokona palyuo karaminyipape Anatu baa namwa pipya karara dokome pii larami dupwa mee ingyuo para.

### Kamongome Poropeta Doko Repe Repe Lamaiya

<sup>11</sup>Kamongome banya porai renge dokome renge kuiyuo namba repe repe ingyuo langyuo dokopa wambu dupwa pelyaminyi kata dokonako paa napipi, leya. <sup>12</sup>Wambunya mende piramo lao lao retelyaminyipape dee bange lapona paka renge nyilyaminyipape dupwana emba rambe rambe palyuo suu pyaa napipi. <sup>13</sup>Namba Kamongo Porai Wakasa kandale doko emba silini dokoño namba poo pyasi ingyuo karoño. Namba iki pakao karape, leya. <sup>14</sup>Namba poo pyasi ingyuo puu penge dokona lao kana wambu dupwa pyalya minyapala lukumarami dopale ingyuo saa kone dopale ingyuo karo dokona Juta wambupi Isaraele wambupi Jerusaleme wambupi dupwa minyaro ingilyamo. <sup>15</sup>Wambu soo kaeyo lukumapala pao palirami ingyara. Nakama isa papala rambetaku pyao waa keta palirami ingilyamo.

### **Kumuyami Dupwa Pii Lamai Nana Lao Repe Repe Pii Porai Mende Leya**

<sup>16</sup>Nakama nambana disaepole dupwame Anatumi banya pii namba keta jiyamo dupwa rakwa pyuo reto minyuo kararami ingilyamo.

<sup>17</sup>Kamongo dokome banya wambu pipya nombe nombe pisipyasa lenge kambu nee pyuo karapyamopape namba doko baame mende pyakarakao lao baa keta pyamalyaro kararo.

<sup>18</sup>Kamongo baame wambu jiinyi dupwa pipya namba role dae karo. Kamongo Porai Wakasa doko banya kinjinya petenge isa yuu kyau Sayone dokona sipyamo karamo. Dokome namwa karamano dakepa banya pii doko pano minyuo Isaraele wambu keta pupwa lao nembelyamo.

<sup>19</sup>Dopa pyuo paramanopape wambu dupwame nakama kando ropaka pisingi dupwape mali mali sakangepe dupwa keta pii eparamo semanaleŋe piso selapa, larami. Dopa pyuo pisirami dupwa nyuo isa palyawaka imambunya pii lena lao piso soo pisiramiko piso soo dokopa kumuyami kande dupwa nakamame namwa nyisala epena lao larami doko kapaja larami ingilyamo.

<sup>20</sup>Embame wambu dopale dupwana pii yano pyakamyuo dopa lamairi. Nakama Kamongo Anatumi aki mende mana langyalyamo lao kale yuku selapape. Ropakape pipu lengepe dupwa kale yuku sakami nalapape. Dopale langilyaminyi dokome nakama uki minyara ingilyamo.

### **Randa Epenge Yuu Gii Doko**

<sup>21</sup>Wambu peparaee yuu dokona suku suku lenge nyuo papyuo dokopa mona kendo lopo parami ingilyamo. Nakamana lopo imbu singipi dokome nakamana Anatu nakamana mee kinjipi kando koo keta palyuo larami. Nakama yake dorena kandalyuo kandarami. <sup>22</sup>Dokopa yuu dokona apa pipala pilyamo lao lenge lukunyi peyapala mona nembo kandaro serami dokopa mee mende maro laa napala randa dokoko maro maro larami. Kandarami dokome nakama paka renge maiyarala soo pao koo dokona nembaramopa koo doko kapa. Wanjarami kata mende sepa nara.

### **Kinji Mende Rengya Karara Doko**

**9** <sup>1</sup>Napatalai Sepyulanepa rara dolapona yuu doko wamba randa epeyamo elya nyuo peteyami doko enakana yuu nakamana dorena kapa seramo pisirami. Ipwa Metitaraniane pete silyamo yuu neta pyakaenge ipwa Jotane dumu wangu ingyuo yuu Galili angi sukusa wambu rara wakale range epo palenge dorena ingyuo pyaka sera.

<sup>2</sup>Wambu iminjiyamo dokona peteyami dupwa ama yanga paupau leyamo kandeyami.

Wambu kumungi renge dokome yambe piyamo peteyami dupwana lao

yanga paupau lenge doko pyaka sakamiyana lao palamo.

<sup>3</sup> Kamongo embame andake ingi raeme kumunya lao  
rae mainyi pyambulini.

Nakama ee mupwasa doko manjo karo dokopa rae maingi doko suu  
pyao

embame apa pyakamipi dokona rae mailyaminyiko.

<sup>4</sup> Mena bulamakaome yulu pinya bange kendande matarena ipyuo  
penge nakama dopale ingyuo karengé doko neta nyuo kokwa soo  
nembee.

Embame Mitiane ami pyao isa palyinyili pyuo  
embena wambu yulu andake maiyuo nyuo isa palyuo kareyami  
yuu lili doko isingi pyao isa palyii kande.

<sup>5</sup> Ami nakama pyala epeyaminyi dupwana kimbu suu  
komau ranjama pareyape dupwa  
isareme rao otara.

<sup>6</sup> Wane mende manjakarami.  
Ikinyingi doko jera ingyamo.

Doko namwa iso karara.

Banya kingi doko Rapu Pingi Nyiso Karengé Elyapiji laraminyi  
karara.

Anatu Porai doko, Letena Renge Palenge Rakanenge, larami.

Kinji Mona Kyuu Lao Singinya Ikinyingi, larami.

<sup>7</sup> Banya kinji yulunya iso karengena porai renge doko ando puu para.  
Banya isingi panda doko yuu peparae mona kyuu lao soo puu para.  
Baa kinji Dapiti kareyamo alonge dokona karara.

Banya porai renge doko rolae angi dokona seramopa rolo lao karo  
pao

yuu gii renga lumwa piramo dokona ingyara.

Anatu Porai Wakasa dokome pii lapyamo dusipana palyuo pinya suu  
pyalu pyao pilyamo.<sup>e</sup>

### Mona Kyuu Lao Singinya Kinji Yulu Doko

**11** <sup>1</sup> Kinji Dapitinya kinji yulu alonge dokona banya rara dokona  
mende pulyara.

Doko isa pokwasi renge dokona angalu pyakalyingi dopale ingyara.

<sup>2</sup> Anatumya Imambu dokome baa mona palenge singinya renge  
soo gisinginya rengepe mora petengena rengepe baa keta  
mairamopa baame banya wambu dupwa iso karara.

<sup>e</sup> 9:8–10:34 Isaraele wambu dupwa Anatumi kote lao randa maiyamo doko kando Juta  
wambu dupwa mana nyinyale lao lasaka piya. Anatumi banya koo pingi wambu Asiria  
wambu keta randa maiyamo dupwa opetae randa nyerami, leya.

- Baame Anatumi dopa pipyali lao suu pyaramo dupwana soo gisapala  
baa ketae pyambu kararamopa
- 3 banya yulu dupwa rae maiyuo pira.  
Baame yanengena ketae kandapalape lasi pii iki soope kote laa nara  
ingyara.
- 4 Baame pendewa dupwa angilae dokonako palyuo lao rolara.  
Baame range kapa nyiso laa naramili dupwana rolae pingi renge  
dupwa kame see nao paka pyao sakamyuo lara.  
Banya laramo dokona palyuo wambu dupwa mojo maiyuo  
koo pingi dupwa kumuo pirami.
- 5 Baame banya wambu dupwa pipya rolo ingyuo paramopa lao mona  
angilae palenge ingyuo iso karara ingilyamo.
- 6 Yana suwa kararope dee mena sipisipipi mendakinya mona seramo  
piso karo pirami.  
Mena lepete dupwa mena meme ene dupwa pipya mendare palyuo  
serami ingyara.  
Bulamakao ikylene mena laene ikylene pipa pakao nenge nao  
kararami.  
Dokopa wane wanakepeme rapu pyuo kararami.
- 7 Mena beya bulamakaope nenge role pyao nao kararaminyipa  
nakamana yakane dupwa mendakinya mona seramopa palyuo  
serami.  
Mena laene dupwame rambi yando mena bulamakaome nengenyili  
pyuo narami.
- 8 Dopako pyuo wane wanakepe kau kyalende sera mare dokona  
nyuo male laraminyipape nao kumaka nara ingyara.<sup>f</sup>
- 9 Yuu Sayone Anatunya yuu kyau poo pyasi dokona  
randape Satane yulupi sepa nara ingyara.  
Ipwa kota soo simbuo eparamo dokonako palyuo  
yuu dokona Anatunya soo nyinginya renge dokome soo simbuo  
rangu para.<sup>g</sup>

**Yuu Dulurena Kiñi Mendena Yulu Dokona Repe Repe Pii Lamaiya**

**28** <sup>1</sup>Isaraele wambunya kiñi yulu doko mee ketae yanengena  
mamba kyaa pingi ingyapala lita wambu biya napala karele  
lao kyanee soo kumasinya mendeke ingyuo silyamo dokona pyao kokwa  
serami ingilyamo. <sup>2</sup>Kamongo doko akali mende eneko porakai nakama

<sup>f</sup> 11:8 Wane wanakepeme rapu pyuo kararami. (11:6)    <sup>g</sup> 11:10–27:13 Anatumi rara wakale wambu Isaraelepe Jutape repeta kareyaminyi dupwa kando randa maiyuo kote larasa pira, lao leya. Dee lakandenge kenane lama pyasi palamo. Anatunya wambu dupwa randa nyeraminypape Anatumi nakama kiiramo nyero leya dokona pii palamo.

nyuo kwuinya palyuo suu pyao karamo. Baa eparamo dokopa apu romende randake kapa pale pale epo pyalamo dopale ingyuo yuu doko kewaipimi anda lalyuo nyili lapala ipwa kama pyao isa kanape manjo pyalamuli pyuo pyara ingyiyamo. <sup>3</sup>Akali kyawa dupwame kyanje soo kumasi ingyuo pyuo karaminyi dupwa mee rambetaku pyao kimbuni nara ingyiyamo. <sup>4</sup>Akali kyawa kyanje singi dupwa bange nakama kamonganyi pyambulyamo dupwa ropeta suwanyi panasi waneme lyuo nelyamosa dee pana nange dopale ingyuo parami ingyiyamo.

<sup>5</sup>Yuu gii mende ene pyaka sera dokopa Kamongo Porai Wakasa doko banya wambu pyao wapu lasi dupwana kyawa rarange kalya pisi doko dopale ingyara. <sup>6</sup>Baame kote serami akali dupwa suu pingi keyange maiyuo yanda pimwai taone kame kambu repeta eparami dupwa makembo kararami dupwa nakamana mona porainyi pyambwakamira.

### **Aisaya Dee Juta Range Poropeta Biya Nenge Dupwape**

<sup>7</sup>Poropeta purisipi dupwa opetae biya napala rolo papi nalyaminyi. Nakama ipwa waene soo kaeyo napala lukumapala angi rolae doko kanda nalyaminyi. Dopa pipala poropeta dupwa Anatumi pii repa repa pyuo lapo lapyamo dupwape dee purisi dupwana renge lapo ipyamo dupwa apa pipala epelyape lao kandalana saka nalyaminyi. <sup>8</sup>Taepo dupwa miku yusoro karapyasa mee mendasa au pyuo see nalyamo.

<sup>9</sup>Nambapa kando suku lao dopa letaminyi. Baame akali api mana letojo lao letase? letaminyi. Apimi banya pii doko yano pipyamo karase? Wane ene anju pyakasi dupwa serami ingyiyamo. <sup>10</sup>Baame namwa pepa kimbu dokonape liti dokonape liti pyuo mana langyuo dee renge dokona wamendo mana langipuli lao langilyamo, letaminyi.

<sup>11</sup>Dokona nakamame nambana pii see narami ramo doko Anatumi wambu wakale pii wakale lenge lapo nyepala pii kanda nange mende mana langinya laramopa dokona renge mende mana nyerami ingyiyamo. <sup>12</sup>Baame nakama peparae imambu selapa lao mona minyarambu piyamopa nakamame selana makayami. <sup>13</sup>Dokona lao Kamongome nakama pepa kimbu litipi renge angi dokope liti pyuo mana langira ingyiyamo. Dopa piramopape yulu peparae nyere kata dupwana emba pyalya minyaramo pao paliri ingyiyamo. Emba ranjama nyuo pyaraminyipa apa pipala pilyamo lao sepa narenepa kiimbapala karapusi anda minyuo para ingyara.

### **Yuu Sayone Dokona Kana Mupwa Doko**

<sup>14</sup>Dakepa nakama akali mupwa yuu Jerusaleme iso karaminyi moŋkyanje singi dupwa Kamongome letamo doko apa letamo lao selapa. <sup>15</sup>Nakamame kumungi renge dokopa wato lao kana minyamaŋa kuma narami lao rangena kingi dokona lakanda minya minya pyuo lao

karaminyi. Nakama kyambo doko kinyi inginyi pyambuo lao nakama mee kyawa minyuo lete karamwali aiya lao lao karamisa pilyamo. Dokona randa eparamo dokopa kapa wanja narama ingilyamo, letaminyi. <sup>16</sup>Dokona lao Kamongo Mupwa Andake Wakasa dokome dakepa dopa letamo. Nambame yuu Sayone dokona kana mende pinginya ingyuo pisirunupa pyuku laa nara letamo. Kana keyangepe mee lao makande pyuo kando otasi kana doko kulisa wakasa. Yuu donge dokona pinginya pyano mupwa ingyuo karara. Mende kana dokona pepa pyasi palira kapa ingingi lao pyamalyapala mona maiyuo kararamo doko mee porai ingyaramo mali sero karara. <sup>17</sup>Lao rolenge renge dupwa kanda soo pinginya pinya makande pingi dopale. Panga soo kyambo laa nange renge doko roya karo makande pingi dopale.

Dopa piramopape apunda randake kapa epapala kyambona renge nakama angi mende lakalyamo lao minyuo petaminyi dupwa pyao soo kaki pira ingilyamo. Ipwa palipala nakamana kapa mondo lao karamano lao suu pingi renge doko kokwa sinyi nembara.<sup>h</sup>

### Isipi Wambu Pipya Pii Kapa Palya Nayamo Kopetame Leyami

**30** <sup>1</sup>Kamongome dopa letamo. Akali lapo yuu Juta iso karaminyi dupwa nambamoo kamba lao mata joo karaminyi dokona nakama kokwa soo nembaro ingilyamo. Nambame kata lapo waso reta nayono dupwana nakamame papala rara wakale dupwa pipya pii palyuo lao nambamoo leyono dupwana isa palyiyami. Yulu koo wambo piyaminyi dupwana kamba ketae pukwai pyuo pyuoko pelyaminyi. <sup>2</sup>Nakama namba kando apa pirama lao langyalase lao piso see napala yuu Isipi range dupwame nyisinya lao pumi. Nakama Isipi range dupwame kyawa lete nyinya lao suu pyami. Dokona nakamame Isipi kiŋi doko keta mona mailyaminyi. <sup>3</sup>Dopa piraminyipape kiŋi dokome porainya kapa pyuo pali naramopa nyisalana saka nara. Dee Isipi wambumi nakama kyawa minyarami lao suu pyaraminyipape randa andake nakama keta epo palira. <sup>4</sup>Dokopa gapomane akali lapo yuu Isipi wambunya yuu taone Soane Anesapana epo pyaka sepaminyipape <sup>5</sup>wambu dupwame nakama angi nyisa narami dupwa keta mona maiminyi dokome Juu wambu dupwa mona rando kando kararami. Juu wambu dupwame rara mendeme nakama nyisakamili lao suu pyaraminyi dupwame nyisalana yakara pira.

<sup>6</sup>Anatunya pii dake yuu muiyane penda penda donorena palenge suwa menape dupwana lao letamo. Gapomane akali nakamana yuu dokona lao yuu wakale dupwana lamaila penge dupwa yuu koo randa singi mena

<sup>h</sup> 28:18–29:24 Anatumi banya wambu keta randa mailana lao suu piya. Suu piyamopape nakama kapa lete wai pyao nyero lao lalu lao leya.

laenepe kau wambu pingipi kau pambeya bii lao pengepe dupwa soo male lenge kata yuupi dokona pelyaminyi. Nakamana mena dongepe mena kamelepe mata dupwana kana malu nembo nyingi bange malu retapala rara dolomame nyisaraminji lao mailana lao pelyaminyi. Dopa piraminyipape wambu dupwame nakama angi mende nyisa narami ingilyamo. <sup>7</sup>Isipi wambu dupwame nyisaminyi doko kapa ingya napya. Dokona Isipi baa kingi wakale lapu doko Kau Pambeya Angi Dokome Wambu Pyalana Saka Nange dopaleje lapu.

### Kamba Lenge Wambu Dupwa

<sup>8</sup>Anatumi namba langyuo, Wambu dupwa apa pyuo karaminyi lao pepana pyao reta, leya. Dokona lao wambu dupwa koo pilyaminyi dokona pii doko angingyuo sulu sera, leya. <sup>9</sup>Nakamame yuu peparae Anatu kyambo lao banya mana pii dupwana mondo lao see nao kamba lao mata maiyuo kareng. <sup>10</sup>Nakamame poropeta akali dupwa pii laa kaena lao pyalana pingi. Dopa pipala nakamame lao, Yulu rolae dupwana lao namwa langya kaena lenge. Lapala, Namwa mende rae maiyuo selana suu pilyamano dupwa langinya lenge. Namwame bange angi kapa pali nara doko mee rae maipala mende pira lapala suu pilyamano doko minyaro karalapa lena, lenge. <sup>11</sup>Namwana kata doko rokwaka napala namwana kata dokona kakondo karalapape. Isaraele wambunya Anatu Poo Pyasi dokona lao laraminyi selana lao suu pyaa nalyamano, lenge.

<sup>12</sup>Dopa laminyipape Isaraele wambunya Anatu poo pyasi dokome dopa letamo. Nakama nambame lapu doko sili see nale lapala apiyanda pyuo pii angi dokona palyuo laa nao minyoko pyuo piminyi dupwame nakama nyisaraŋa lao suu pilyaminyi. <sup>13</sup>Nakama kopetame pilyaminyi. Nakama kana kame andake lano poro laro kareng dopale ingyapala nakama aopa kulimbuo kalimbuo minyuo isa parami ingilyamo. <sup>14</sup>Nakama pee warame wasisi poro lenge dopale ingyuo poro lao muu muu pirami. Ama kopetame poro laramopa kuki mendeme isare pee nyuo nembarami laope panda ipwa kamuo nyerami laope see nara.

<sup>15</sup>Kamongo Mupwa Andake Wakasa Isaraele wambunya Anatu poo pyasi dokome wambu dupwa lamaiyuo lao, Nakama kapu kyuo epo kui lao namba keta pyamalyuo karalapa. Dokopa nakama porai ingyuo randa dupwana kapa namba alya minyapala kararami. Dopa pipwa lapunupape nakama dopa pinya kamba letaminyi, letamo. <sup>16</sup>Nakamame namba keta pyamalyeramili doko kaepala nakamana mena ose kata makandenge dupwa nyepala piso pao nakamana yanda pimwai dupwa wanjinyi nembarama lao suu pyao rapa rapa pilyaminyi. Doko nakama wanjinyi nembaramaŋa lao suu pilyaminyi doko rolaeko doŋo nakamana mena ose dupwa kapa puu lao makandenge lao suu pilyaminyi. Dopa pyuo suu pyaminyipape wambu lapome nakama minyaro nyuo pyala eparaminyi



dupwa kamame puu wakasa lao makandarami. <sup>17</sup>Yanda pimwai yanda singi mendaki iki kandapala dokopa nakama dokona wambu taosande pako makando parami. Yanda singi kingi paki eparaminyi dusipa kandapala nakama peparae pako makando parami ingilyamo. Nakama dupwana mendale kara naraminyipa komau palake yukungi isa doko iki yuu kyau dokona pero karara, Kamongome letamo. <sup>18</sup>Dopa piraminyipape Kamongome sakame kumuo nakama nyisalana lao isaro karamo. Kamongo baame yuu peparae anjuku rolae lao dokonako pingi dokome nakama kando kondome kumuo nyisalana suu pyao rapa rapa pisi karamo. Kamongo kapa ingingi lao suu pyao mona pyamalyapala karaminyi wambu dupwa rae maiyuo parami ingilyamo.<sup>i</sup>

### Anatumi Jerusaleme Iso Kyawa Minyara Ingilyamo

**31** <sup>1</sup>Nakama yuu Isipi nyisinya lao pelyaminyi dupwa kumuo rumbyuo parami. Nakama Isipi yanda singi malu porai renge palengepe mena osepe mena ose ipyuo papingi uliulipi yanda singi dupwape kandapala nyisaramini lao suu pyao mona maiyuo pelyaminyi. Dopa pipala Isaraelena Kamongo Anatu poo pyasi dokome nyisaramo kararama lao pyamalyuo paope dee baame nyisinya lao piso soope pii nalyaminyi. <sup>2</sup>Baa akinde pilyu lao doko range singi. Sepala baame randa dupwa peenge. Peyapala wambu koo pingi dupwape dee wambu lapome koo dokona nyisingipi dupwa keta randa mailana lao rapa rapa pingi doko maipala kaenge. <sup>3</sup>Isipi wambu dupwa nakama anatunde daa. Nakama mee wambu dokoreko. Nakamana mena ose dupwa imambu palengende daa. Anatumi lenge angimi kandaramo dokopa wambu rara porai dupwa kalyuo sinjimu ingyuo nakamame wambu rara porai daa nyisiyami dupwa opetae isa palyara. Dopa pipala dolapo laparae pyao kokwa sinyi nembara.<sup>j</sup>

<sup>4</sup>Kamongome namba langyuo lao, Mena sipisipi rapu pingi akali dupwame pii poraiyuo lao ala laraminyipape mena laene dokome mena pyasi doko yaki nyuo pena lao mona pakanyi pyambuo ralinyi namba narami ingilyamo. Doko suu pyao namba Kamongo Porai Wakasa dokome yuu kyau Sayone doko kyawa minyaroŋo lao laro dokopa mendemepe kata rokwa nara ingilyamo. <sup>5</sup>Yakame banya anda dokona yakane dupwa kupyaro soo rapu pelamuli pyuo namba Kamongo Porai Wakasa dokome Jerusaleme reto yaki nyii nao range kupyaro sero.

<sup>6</sup>Kamongome lao, Isaraele wambu dupwa nakamame namba kando koo pipala namba mata rukyuo pilyaminyi. Dopa pilyaminyiko doŋo epapu

---

<sup>i</sup> 30:19-33 Banya wambu randa nyiyaminyi dupwa elyape keta pisaro lao Anatumi lalo lao leya. Dee Asiria wambu keta randa epara, Anatumi leya. <sup>j</sup> 31:3 Yakame banya anda dokona yakane dupwa kupyaro soo rapu pelamuli pyuo (31:5)

namba karo dokona range kapu kyuo ipupwape. <sup>7</sup>Yuu gii mende epara ingilyamo. Dokopa nakama peparaeme kana golomepe kana kulingimipi yulu koo bange anatuŋu lao kingimi wasiyaminyi dupwa nembarami. <sup>8</sup>Asiria wambu dupwa yanda pipala yandana kokwa soo koo keta palyuo paraminyipa mee akalinya porainya renge mendeme pyaraminde daa. Dokopa Asiria akali dupwa yandana pako pyako paraminyipa nakamana wane parange dupwa karapusi ingyuo kendemande yulu pyakamyuo kararami. <sup>9</sup>Nakamana kiŋi doko pako yamarangupala pyako para. Dokopa akali ami mupwa dupwa ama wakasa pakapala yanda pela pao dokopa minyuo penge komau palake dupwa kame soo yaki nyepala parami. Kamongo Jerusaleme dokona misi lao lakandenge dokona isare rao karelyamopa mena pyao kiso maingi, Kamongo dokome leya.

### Kiŋi Mona Angi Palyuo Rolae Pingi Doko

**32** <sup>1</sup>Yuu mendepa kiŋi mona angi palenge mendeme rolae pyuo iso dee mee wambunya lita akali dupwame yulu rolo pyuo kararami. <sup>2</sup>Nakama mendaki mendaki lao dupwa yuu penda penda dokona raiya minyuo neta rao randa piramo dokopa kananda dokona yalu pingi dopale ingyuo dee porambaiye eparamopa mendena pao alya minyungi dopakale ingyuo parami. Nakama yuu muiyanena ipwa epo penge dopakale ingyuo dee yuu ee nengepe jingi lyuo anda nange dupwana kana londe lapo petenge dokona rau lenge dopale ingyuo parami. <sup>3</sup>Nakama wambu yango bange aeya naramo kararami dupwa nyisalana lao lenge rao dee kale lumbuo soo pyuo kararami. <sup>4</sup>Nakama mee langa puu pae lao pii narami ingilyamo. Nakama soo giso yulu pyuo dopa lao letoŋo lao renge angi doko soo larami ingilyamo. <sup>5</sup>Wambu mendeme kopyali ingyuo karenge doko lakanda minya minya pyuo kara naope panda arasekolo akali doko angi kinyinya lenge ingyuo karamo lao laa naramiko. <sup>6</sup>Wambu kopyali dokome pii kopyaliko dupwana palyuo lapala yulu koo dupwanako suu pyara pyara pyuo pira ingingi. Baame yulu pyuope pii laope Kamongopa kilya kando lapala baame wambu lopo karenge nenge mai nao dee wambu ipwa nano karo pingi dupwa mai naoko pingi. <sup>7</sup>Wambu mona pali nange kopyali dokome yulu kopetame dupwako pingi. Baame wambu pendewa dupwa kando kyambo panga soo pii lapo lamaipala koo ingyuo kokwa sinyi nembalana lao pyuo dee bange angi rolae nyeramili dupwa nyii nana lao kata rokwamingi. <sup>8</sup>Dopa pilyaminyipape akali angili dokome panga see nao angi kinyi lao rolae doko anjuku lao dokona yaki nyii nao poraiyuo pyuo karenge.

### Kote Lao Randa Maipala Enakana Kyaka Ingyuo Pyuo Nyera

<sup>9</sup>Nakama enda dupwa enyana soo manda rao awa awa pyuo piso nakama keta mona randange renge mende pali nange dupwa apa letene

lao selapape. <sup>10</sup>Dakepa nakama sikya pipyamo pisiminyipape dakepa ee kana dumbinya nakama isa girapo jingi lyuo nyerami ingya narasa yangyaramo kararami ingilyamo. <sup>11</sup>Wamba nakama randa epa napyamo awa awa pyuo koo soo piso karo pimi kandapi dupwa dakepa pakame kumuo walu walu lao karo nakamana komau rokwanyi nembapala mee asingi dupwame kanya romba dupwana bole bale lapala karalapape. <sup>12</sup>Nakamana ee yuupi amenge pingi dupwa dee isa girapo eepe paleta kokwa soo pao ikyaikya neperekepe nambana wambunya yuu dokona andelyamo dokona nakama kondome kumuo kyangali kingi rangome pyao pyao pyuo karalapape. <sup>13</sup>Wamba dokopa nakamana anda dee yuu taonepe rae maingi rengeme simbwayamo mona kyaka palyuo wambu paleyami kande dokona suu pyao ee lalapape. <sup>14</sup>Dokonako ingyuo kamame kininya anda doko kame soo yaki nyuo kaeyapala yuu taone kyawa doko kame soo kaeyara. Dee anda dupwape dokona bange porai nee pyuo iso karengi dupwape peparae momo nao para. Mena donge rae lenge dupwa dokona mee langarale papyuo kararaminyipa mena sipisipi dupwame dokona rambe isoko andaramo narami.

<sup>15</sup>Dopa piramopape Anatumi banya Imambu doko dee namwa keta mapanyi peyara. Yuu kwaeyo mee soo paramo dupwa amenge pira. Dee ee yuu dupwa nenge jingi angi mupwa dupwa ando palira. <sup>16</sup>Yuu dupwa pepararena kapa kapa pyuo wambu peparame rolae doko anjuku lao pyuo dee kote pii soo rolo pirami. <sup>17</sup>Doko wambu dupwa peparame yulu rolae doko anjuku lao pirami dokome mona kyuu lao seramopa koo keta pali nao karalu kararami. <sup>18</sup>Anatunya wambu mona namba nao nakamana anda dupwana mona seramopa koo dupwa sukusa nyepa nao piso karo pirami ingingi. <sup>19</sup>(Dopa piramopape imwa dokona randake kapame pyaramo dokopa taone andake doko lalyuo sipirape pinyi nembarami.) <sup>20</sup>Ee nengepe dupwa rombe lao andaramopa yuu pepararena mena donge mena bulamakaope rambi nao koo soo ando kararaminyipa wambu peparae rae maiyuo kararami ingilyamo.

### Nyisinya Lao Ateŋa Lenge Pii Doko

**33** <sup>1</sup>Namwana yanda pimwai dupwa nyuo anamasi minyaraŋa. Wambu wakale dupwame nakama pyao anda yuupi yanga nayaminyipape nakamame pyao anda yuupi yangeyami. Pyapala anda yuupi yangapala nakama randa nyerami yuu gii epara lao mona rando parami.

<sup>2</sup>Kamongo embame mende piri lao soo karamano dokona namwa kando sakame kumuo karape. Namwa yangaramo yaka lao nyiso randa eparamo gii dokopa kyawa minyuo karape. <sup>3</sup>Embame namwana lao yanda pyakarene dokopa yuu muu andake dupwana wambu wakale dupwa yanda keparoko doko sepala mee paka parami ingilyamo.

<sup>4</sup>Nakamana pinji andape dupwa waiya lao epo nyuo arete pirami ingilyamo.

<sup>5</sup>Kamongome bange wambupi peparae iso karengé dokona baa apa pyuo wakasa lao see narami. Baame Jerusaleme dokona akali pii angi lao mona palyuo rolae pingipi dee rolo angi dokoko lengepe dupwame simbwaro karena lara. <sup>6</sup>Dopa pyuo simbunya lapala wambu peparae porai ingyuo kame piru karena lara. Baame banya wambu dupwa kyawa minyapala mona angi palyuo singinya renge soo nyinginya rengepe maingi. Nakamana bange kulisa andake ingyuo retenge doko Kamongo baa wakasa lao suu pingi doko retenge.

<sup>7</sup>Akali paka nange dupwame nyisinya lao kyakale letaminyi. Pii lakala pena lenge akali dupwa koo pyuku pyuku penge renge minyuo epena saka napala ee ramu ramu pyuo letaminyi. <sup>8</sup>Kata andake jima jima dupwana yulu moŋo sipyasa wambu dokona papi nalyaminyi. Pyaso mendaki ingyarama lao wato lenge makande dokona waingi pyao minya nalyaminyi. Yulu dupwa kulimbuo dopa pyuo piramaŋa lao mona mendaki palyuo larami dupwa waingi pyao minya nalyaminyi. Dee yango mendena kingi dupwa ketae pyambwa nao kwuanyi nembo pilyaminyi. <sup>9</sup>Yuu doko mee sinya lao yaki nyuo pelyaminyi. Lapanone imwa andake dokona isa yoko dupwa kope kape lapyamopa yuu Sarone amenge pingi rapu doko pao penda penda ingilyamopa yuu Besane yuu kyau Kamele dolapona isa yoko panda dupwa kirali pao kwaelyamo.

### **Kamongome Banya Yanda Pimwai Dupwa Repe Repe Lamailyamo**

<sup>10</sup>Kamongome wambu yuu liti wakale wakale dupwa lamaiyuo, Namba dakepa sipuraroŋo nambana porai renge palenge lao lasaka piroŋo kandalapale, letamo. <sup>11</sup>Nakama dopa pyuonde pimana lami dupwa angi ingyua nao para dupwana mee kekenge pii lamisa isare dopale ingyuo nakama range kokwa silyamo. <sup>12</sup>Nakama nepereke karengé doko isareme kingi naso ralamuli pyuwape dee kana doko isareme rao lakao ranapala mee isare pee ingyuo isa puu pao parami. <sup>13</sup>Wambu repeta palenge dupwape nanesa dupwape nambame piyunu pii raiya dupwa sepala namba porainya renge palenge lao soo gisirami.

<sup>14</sup>Sayone range wambu dupwa yulu koo pinya wangu lakange pako walu walu lao karo lao, Anatunya kote lao rolenge dokome isare ingyuo rao karalu karara dokona namwa apa pyuo lete kararama? <sup>15</sup>Lete karalana ramo doko rolae doko anjuku lao pirami. Nakama pendewa dupwa kando panga soo ilimungu kalimungu lao bange nyakami narami. Dopa pyuo kunji pyuo kana nakami nalapape. Nakamame wambu pyao kumakalana pingipi yulu koo wakale wakale pinya pingipi pipya role pyao kara nalapape. <sup>16</sup>Dopale karaminyi dokome yuu kyau dokona anda porai karengé dopale ingyuo au pyuo kararami dokopa nakamana yuu dokona nenge ipwape seramuli pyuo nao palu karalu kararami ingilyamo.

### Rengyana Elyape Keta Pisirami Doko

<sup>17</sup>Dopako pyuo kiŋi mendeme banya iso karengi yuu kata luna dusipana suu laro karo nanesa keyange ingyuo ando nyimbara dusipana iso kararamo kandarami. <sup>18</sup>Nakama mende pakao karaminyi doko yuu wakale range dupwame kana takisi nyakayaminyi dupwape yalu pyuo yuu pandape kandanyi lyakala epenge akali dupwape mee kombeyame ingyuo para. <sup>19</sup>Nakama kyaŋe singi wambu yuu nanesa range pii wakale lenge dupwana mende dee lenge kambu kanda narami. <sup>20</sup>Sayone yuu taone andake namwana misi lenge dokona pati lao kalya makandope pyuo pingi doko kandalapa. Jerusaleme doko randa see nange ingyaraŋa dokona yuu palu palenge ingyuo sera ingyiyamo doko kandalapa. Yuu doko komau anda kana ingyaro karengi dopale ingyuo dee pinginya isa anda simu pyao minyaro karengi dopale dee banya puu doko porai rokwa nange dopalepe ingyuo sera. <sup>21</sup>Kamongome banya neta reŋge yulu doko namwa lasaka pira ingyiyamo. Namwa ipwa kameya ruŋuŋuŋu pyuo epengepe ipwa pona kukipi repeta palyuo kararama ingyiyamo. Dopa piramanopape yanda pimwai sipu dupwa minyuo repeta epa narami. <sup>22</sup>Ipwa sipunya komau porambaiye nyingi dupwa kaolena saka narami dokona komau rongo pipala mee serarami. <sup>23</sup>Ami yanda pimwai dupwana mena bangepe dupwa namwame nyuo soo parama ingyiyamo. Mena bangepe ama malu seramosa kata papya nange wambu dupwame soo kaeyo seramo dokona nyerami ingyiyamo. Kamongo baa range namwana kiŋi mupwa ingyuo namwa kyawa minyuo iso karara. <sup>24</sup>Dee namwana yuu dokona palirami dupwa peparae anga pilyamo lao mumu laa narami ingyara. Dee koo peparae nyuo kame sisi sera.<sup>k</sup>

### Kata Poo Pyasi Doko

- 35** <sup>1</sup>Yuu bange anda nange muiyane doko rae wakasa maira. Yuu dopale dokona kalya pingi isa dupwa jingi lyuo rao karara.
- <sup>2</sup>Yuu bange anda nange doko  
yuu kyau Lapanone au piyamuli pyuo rae maipala kenane poraiyuo pyara.  
Yuu Kamele amenge pinginyili pyuo yuu muiyane doko seramopa wambu peparame Anatunya porai reŋgepe neta reŋgepe yulu wakasape doko anga kandarami.
- <sup>3</sup>Kingi kondelyamo dupwape dee kimbu walu lenge dupwape porainyi pyambuo karalapape.

<sup>k</sup> **34:1-17** Anatunya nyisu petenge dupwa kokwa soo paraminyi dokona kenane pii lao reteyamo dakena palamo.

- 4 Wambu yamarangyuo yaki nyelana pilyaminyi dupwa dopa lamaiyuo,  
Anatumi nakamana yanda pimwai dupwa isingi mojo maiyakala epana pilyamo dokona paka nana, lamai.
- 5 Lenge koo dupwa lenge rao kando kalepoe dupwa pii soo pirami.
- 6 Papae rambungi dupwa sipurapala malya pyao pii laa nange dupwa rae maiyuo kyakale lao pirami.  
Yuu muiyane yando dokona ipwa lyuo para.
- 7 Yuu kee netame kana ingyuo rao alyingi dokona ipwa pete sera.  
Yuu oo lasi dupwana ipwa renge palyuo guu lara.  
Yuu koo yana suwa kararope palyuo kareyaminyi dokona maimbupaka pulyuo pyuo karara.
- 8 Yuu dokona aewae kata ingyuo wasaramopa kingi Poo Pyasi Kata laraminyipa koo pingi dupwa kata dokona papyra narami ingyara.  
Kopyali minyingi dupwame kata dokona paa narami ingyara.
- 9 Mena nalana pingi dee mena laenepe dupwa kata dokona papyra naraminyipa Anatumi kiiramo nyisi wambu dupwa iki anda kata dokona parami.
- 10 Nakama rae maiyuo Jerusaleme kando nyuo dokopa kenane poraiyuo pyao rae maiyuo parami.  
Saka rengepe mona randange rengepe dupwa nakama keta epa naramopa rae maiyuo karalu kararami.<sup>1</sup>

#### Rengya Mende Pyakara Lao Soo Manjo Karengge Pii Doko

- 40** <sup>1</sup>Namwana Anatumi lao, Nambana wambu dupwa nyisakao mona minyarambu karape, letamo.
- <sup>2</sup>Jerusaleme wambu dupwa nyiso mona porainyi pyambuo karape. Nakama lamaiyuo, Randa doko yuu andarele kapa napelyaminyi. Epapu nakamana koo dupwa kame sisi silyamo, lao lamaipi. Doko nambame nakamana yulu koo dupwana manda manjo randa doko maiyuo kaepu.

<sup>1</sup> 36:1–39:8 Asiria kiñi Senakeripi lenge doko yuu Juta doko pyao nyela epeya. Yuu taone andake Jerusaleme doko Asiria wambu dupwana kingi raka lao Anatumi neta nyiya. Dee kiñi Esekaya baa anga andake piyamopape enakana kapa ingiya.

- 3 Pii mende dopa lao kyakale lao,  
 Kamongona kata mende yuu muiyane dokona mondo lao  
 retakamipape.  
 Yuu nenge anda nange muiyane dokona namwana Anatunya kata  
 doko wapuo rolae pyuo karalapape, letamo.
- 4 Yuu oko dupwa peparae pyao rolana.  
 Dopa pipala yuu kyau andakepe kukipi dupwa peparae pyao panda  
 lama lama inginya.  
 Dee yuu koo kyau pyalya pyana pingi dupwa rambi kwuasi sera.
- 5 Dokopa Kamongona neta renge yulu maro lao panara.  
 Dokopa wambu peparame kandarami.  
 Doko Kamongo baa rangeme dake lalu lao lao kaeyamo dokona pira.
- 6 Pii mende ketae palyuo lao, Wai pii mende lamaila puu, lapy.  
 Lapyamosa aki wai pii mende nambame lamairusi lao piso sipu.  
 Dokopa lao, Wambu peparae makwa isa ingyuo karo kuku  
 pyaraminde daa letamo.  
 Jingi bui renge dupwa yuu gii mendasipa iki au pipala loo lenge  
 kandale.
- 7 Kamongome poo raiya dupwa ketae minyinya lao pelyamosa  
 isako dupwa yando napala isa jingi dupwa loo lao isa penge.  
 Wambu dupwa isako manda manjo waiya lao otarami.
- 8 Doko suu pyao wambu dupwa mee dokona mendeke ingyuo  
 karaminyi pilyamo.  
 Kamongona pii doko mee isa sulu sera letamo.<sup>m</sup>
- 9 Jerusaleme, yuu kyau ketae dokona pulyuo papala  
 waili pii keyange doko lamaipi.  
 Pii ketae palyuo kee lao,  
 Sayone wambu dupwa waili pii keyange doko lamai.  
 Dopa pyuo lao papyuo paka napipi.  
 Yuu Juta taone wambu dupwa lamaiyuo,  
 Nakamana Anatu doko epeyamoŋo, lao lape.
- 10 Kamongo Mupwa Andake Wakasa dokome porainya renge palyuo  
 banya wambu dupwa iso karala epeyamo.  
 Epo dokopa banya wambu kiiramo niyamo dupwa role pyapeta  
 lanyuo epeyamo.
- 11 Baame banya mena sipisipi dupwa sipisipi rapu pingi akalimi  
 pyamuli pyuo mondo lao rapu pira.

---

<sup>m</sup> 40:8 Nakamana Anatu doko epeyamoŋo, lao lape. (40:9)

Baame mena sipisipi yakane dupwa nyuo pyasepala  
 banya kingi kalengena reto kupyuo lanyuo papira.  
 Baame sipisipi yakane dupwana endangi dupwa anjiki pyuo  
 laminyuo para.

**Isaraele Wambunya Anatu Dopale Mendepa Manda Manja Nange**

- 12 Mendalimi ipwa kota pete doko nyuo kingi kapena retapala  
 makande pyuo  
 panda yake dulu kingi dokome makande pyuo pira ingilyase?  
 Mendeme yuu dakena yuu dupwa pee kapona pyambwapala  
 minyara ingilyase?  
 Panda yuu kyau kuki epengepe dupwa nyuo makande pyuo sikyali  
 pirase?
- 13 Api mendeme Kamongona suu pingi dokona serase?  
 Api mendeme baa kando dopa pyuo pipingi mana laramopa pirase?
- 14 Apimoo pipya Anatu saka nalyasa  
 dopa pipala pirama ramo kapa ingyara lao wato lao petengese?
- 15 Kamongona lenge kambu dokona wambu yuu muu liti andakena  
 petaminyi dupwa mee kuki ingingi.  
 Nakamame Kamongome kandapyamo dokopa ipwa goe mendaki  
 dopale ingyuo penge.  
 Yuu kuki ipwa kota nanesa singi dupwa banya lenge kambu dokona  
 mee sinjimu yaepa dopale ingingi.
- 16 Yuu Lapanone imwa dokona mena karaminyi dupwa pepara  
 Anatu pyao kiso mairaminyi kapa pii nara ingilyamo.  
 Dee isa malu dokona karamo dokome kapa pyuo waiyuo isare kisa  
 narami ingilyamo.
- 17 Yuu muu peparaena wambu malu petamano lao suu pilyaminyi  
 dupwa Anatanya lenge kambu dokona angi mende daa ingilyamo.
- 18 Api mendeme Anatupa manda manjo larase?  
 Apa pyuo embame baa apiyakalende lao polo larese?
- 19 Yulu pingi akali dupwame mee bange anatuŋu lao kingimi waso  
 kana golome yambe pyuo  
 rate kuki kana kulingimi wasingi dokona ketae retenge dopalende  
 daa.
- 20 Akali mendeme kana kulingipi kana golope dupwa kapa ropo pyara  
 ingya nange dokopa  
 isa kwaeya nara lapo kando nyerami.  
 Nyepala baame akali lapo kando mora piso wambu ingyuo wasingi  
 mende koto nyepala



akali ingyuo rolae pisapenge doko wasakana larami.

- 21 Emba see nangese?  
 Emba yuu wamba langya nayamisi?  
 Emba yuu doko apa pipala kanda siya lao see nangese?
- 22 Baa isa yuu dokona ketaepe yake dulunya pena  
 banya petenge isa dokona petenge dokome wasiya.  
 Wambu isa palaminyi dupwa baa sipurali kuki dopale ingilyamo  
 kandenge.  
 Baame yake doko komau ingyuo minyuo pee lao  
 komau anda pipala palenge dopale inginya lao pingi.
- 23 Baame gapomane akali wambu iso kareng porai dupwa  
 isa palyuo kingi laa nana lao kareng.
- 24 Nakama angi pingi pyao karapa narami doko  
 Kamongome porambaiye peyara dokopa  
 dupwa mee kalendau porakana ingyara.
- 25 Api mendepa Anatu poo pyasi dokopa manda manjo karara  
 ingilyase?  
 Baa yale mende mendasa karase?
- 26 Yake dokona kandalyuo kandape.  
 Embame bui kandelene dupwa apimi wasiyase?  
 Mende yanda singi ami ingyuo laminyuo penge dokome  
 akipare karaminyi lao soo otenge  
 dee bui mendaki mendaki lao kingi lenge.  
 Banya porainya reng doko kamame andake wakasa dokome  
 mendaki mendepe neta pyarepala paa nana lao singi.
- 27 Isaraele akipamo embena randa dupwa Kamongome sepa napala lao  
 rolaka naralyamo lao suku lao karepe?
- 28 Kamongo baa lete karo puu penge.  
 Baame yuu muu peparae wasiya.  
 Baa makame kumuo mende pii nara inginginde daa.  
 Banya suu pingi dupwa mendemepe sakami nange.  
 Doko nakama see nao soo nyii nao pingisi?
- 29 Baame wambu lapo kapa ingya nao makame kumuo kareng dupwa  
 porainyi pyambungi.
- 30 Nakama parange ingyuo kararaminyipape poraya naramo kararami.  
 Akali parange dupwa makame kumapala mee isa paramiko  
 ingilyamo.
- 31 Dopa piramopape wambu Kamongo nyisara lao baa keta pyamalyuo  
 kapa ingingi lao suu pyao karaminyi dupwa

porainya renge enenge nyuo kararami.  
 Yaka kambe banya papakeme ketae poraiyuo soo penge dopale  
 ingyuo kararami.  
 Nakama makando paraminyipape maka narami.  
 Dee kata paparaminyipape nakama mee porai ingyuo kararami.

**Anatumi Mende Piru Lao Isaraele Wambu Dupwame  
 Angiji Lao Ingyara Lao Soo Nyinya Lao Piya**

**41** <sup>1</sup> Anatumi lao dopa leya.  
 Nakama yuu nanesa palaminyi dupwa nambana pii soo elya kalo  
 karalapape.

Kote pii dupwana lalapale rapa rapa pyuo karalapape.  
 Nakamana pii laraminyi yuu gii doko sera ingilyamo dokona  
 api doko angi rolae larape lao lao semanale.

<sup>2</sup> Apimi yanda pyuo anamasi minyngi akali doko neta potemenge  
 dorena piso lanyuo epeyase?  
 Dee baa anja panda anja mendasa pelyamo dupwana baa wini pinya  
 lao pingisi?

Apimi kiŋi akalipi yuu liti wakale wakale wambu dupwape nyuo  
 amena lao porai renge mailyase?  
 Banya wua gela dokome nakama pyao mee sinjimu inginyi  
 nembenge.

Banya walekya dupwame nakama pyao poo raiyame kalendakuna  
 polo nembele lenge.

<sup>3</sup> Baa minyaro nyelana makando peta papala range kyawa lete nyuo  
 kimbu pyao piso penge.  
 Ama puu wakasa lao papala kimbu yukuna doko eketa rapu dokona  
 palipae pilyasa yuu dokona angingyuo warenda nange.

<sup>4</sup> Apimi dokona karapala yulu dopale dupwa pyaka sinya lao piyase?  
 Api mendeme wambo pyuo kaeyamo dupwana doko mende wamba  
 piyana lao soo giso lara ingiyase?

Namba Kamongo doko wamba enye kanda siyamo dokopa kareyo.  
 Dee namba Kamongo doko lumwa piramo dokopa dokona kararoko  
 ingilyamo.

<sup>5</sup> Yuu nanesa palenge wambu dupwame nambana yulu piyunu doko  
 kando kaeyami.

Kando pakapala nakama walu walu lao pakame kumulyaminyi.  
 Dokona lao nakama nyuo malu palyapala imi.

<sup>6</sup> Bange wasingi akali dupwame mendeme mende nyisalya nyisana  
 pyuo rangeme porainyi pyambuo pingi.

- 7 Kamonda akalimi kana golome anatu ingyuo wasingi dokome au pyuo pipyalamo, lenge.  
 Pena pena pinya lao wasingi akali dokome  
 akali mende pirimi pyao bange angi doko nyuo pyaso wasaramo  
 doko kandokondali pyuo pinya lao porainyi pyambuo lara.  
 Dee nakamame lao, Yango kimbu soo wasisi doko keyange  
 pipyalamo lenge.  
 Lapala mee bange anatu kingimi wasisi doko pisarami panda dokona  
 pirimi pyao rambu lao pisingi.
- 8 Dopa pyuo karaminyipape Isaraele dupwa nakama nambana  
 kendemande wambu.  
 Nambana puu minying akali Aporakamena para pyasi dupwa  
 nambame nakama rombo palyuo nyiyu.
- 9 Nambame nakama emba yake yuupi lili rambungi dokona piso  
 minyuo epeyo.  
 Nambame nakama yuu kyukunaiya kamame nanesa peteyaminyipa  
 kee lao nyiyu.  
 Nyepala nakama langyuo lao, Nakama nambana kendemande  
 wambuŋu.  
 Nambame nakama kilya kando mata jii napala nakama rombo  
 palyuo nyiyu.
- 10 Namba nakama pipya role karapunu pilyamoŋo pakame kumuo kara  
 nalapape.  
 Namba nakamana Anatuŋu bange mendemepe nakama keta paka  
 mona palyinyi pyambwa nanale.  
 Nambame nakama porainyi pyambuo nyiso kararo.  
 Namba konambena mendeke alya isa ingyuo kyawa lete nyuo nyiso  
 kararo.
- 11 Wambu lapome nakama pipya imbu singi manjarami dupwa  
 kingi isa paramopa pyao anamasi minyaraminyi renge doko soo  
 nyerami.  
 Dee dopako pyuo lapome nakama pipya yanda pimwairami dupwa  
 kumarami.
- 12 Dee isa yuu dakena mende laa nao mee opeape poko pana narami.
- 13 Namba nakamana Kamongo Anatu doko ingyuo karo.  
 Nambame porainyi pyambuo lao,  
 Nyisaroŋo dokona paka nalapape lapunu pilyamo.
- 14 Kamongo dokome lao,  
 Isaraele wambu dupwa nakama kuki ingyapala porai ingya  
 napyamopape

namba nakama nyisaronjo paka nalapape.

Namba Isaraele wambunya Anatu poo pyasi dokome nakama kyawa lete nyuo nyisiyu kande.

15 Nambame nakama isa warake dokona nenge pyao injingi dopale inginyi pyambworo.

Isa warake dokona piri yale nenge kareng dupwa potemaro karara. Nakamame yuu kyau dupwa pyao injo kokwa soo nembarami ingilyamo.

Yuu manda kuki dupwa inji ranji pyuo sinjimu inginyi nembarami.

16 Dopa pipala pyao yake dulunya nembaraminypa porambaiyeme soo pao kopa apupi dokona raeyara.

Dokopa namba nakamana Anatu dokona nakama rae mairami. Nakamame namba Isaraele wambunya Anatu poo pyasi doko lakandarami ingilyamo.

17 Nambana wambu dupwa bange ipwape yano pyaramopa nanapala ipwa kotarami dokopape

nakamana pendoko oo laramo ipwa nanarami dokopape namba Kamongo dokome nakamana atenja doko isingi yano pyakamiru.

Namba Isaraele wambunya Anatu dokome nakama kame soo yaki nyii naro.

18 Nambame yuu kyau mende anda nange dupwana ipwa epena lao peyaronopa

dee yuu pau lama lama dorena ipwa guu lanyi peyaro.

Nambame yuu muiyane doko alowa pyuo ipwa pete sinyo lao dee yuu yando penda penda dupwana ipwa endangi palyuo epo karena lao piru.

19 Nambame yuu muiyane dupwana isa rara wakale wakale dupwa pulyuo andena lao piru.

Dopa pipala yuu mende anda nange dupwana ando imwa palira. Paliramo dokona isa rara wakale wakale ando kararami.

20 Wambu dupwame doko kandapala

namba Kamongo Anatu dokome piilyamo lao soo nyerami.

Isaraele wambunya Anatu poo pyasi dokome

dopa pinya lao piyasa piyalyamo lao nakama soo gisarami.

**Isa Kanapeme Wasapala Anatuju Lao Lakandenge  
Dupwa Kando Anatumi Pii Mende Lamaiya**

21 Kamongo Isaraele wambunya kiŋi dokome dapa lara ingilyamo. Wambu rara peparaena mee bange anatu dupwa nakamana pii dupwa minyuo epo peyalapape.

- Nakamana apiyanda pyuo lenge pii dusipa yapapala minyuo ipupwape.
- 22 Dae epapala rengya apa pira lao dokona polo lalapape.  
Laraminyipa yuu gii dokopa piralyamo lao namwa soo nyepala kararama ingilyamo.  
Dokona nakamame kote pii lenge dokona wamba apa piyamo dupwana lao polo lamailapape.  
Lamaipala renge angi aki lao dokona wapu lao langyuo pipwape.
- 23 Rengya mende piramo doko namwa langipwape.  
Dokopa namwame nakama anatuŋu lao soo nyerama.  
Yulu keyange lapo pyuoŋe panda randa lapo minyuo epepe pipwa.  
Pipala namwa keta yamarangyuo paka mona manjinyi pyambwalapape, leya.
- 24 Lapala lao, Nakamape nakamame yulu pilyaminyi dupwa angi mende ingya napala mee ingyuo pelyamo.  
Dee wambu lapome nakama kingi wapambupi lakao jilyaminyi dupwa kando ipyuo miku kasilyu.
- 25 Dokona lao nambame neta pyakaenge dorena range akali mende rombo palyuo kaeyapu.  
Baa dulurena karo wambu palaminyi dupwa pinya lao lanyuo eparo.  
Dokopa akali pee warame wasingi dokome banya kimbuni wara kalyuo injo pingi doko suu pyao  
baame akali mupwa dupwa wara ingyuo kalyuo isa palyara ingilyamo.
- 26 Dokopa namwame kinyi emba kapa angi rolae dokona letene larami lao  
nakama dokona api mendeme doo leto doko kinyi angi piraŋa lao lamisi?  
Nakama mendeme dokona lao pii kuki mende laa nayami kande.  
Nakama mendemepe pii kuki mendeme laminyi see nayami kande.
- 27 Namba Kamongo dokome wambo kanda soo yuu Sayone dokona pii wai nembeyo.  
Nambame yuu Jerusaleme dokona pii minyingi akali mende nembo lao,  
Nakamana wambu dupwa anda epelyaminyi lyakande leyo.
- 28 Nambame mee bange kingimi wasisi anatu dupwa kandapunu dokopa  
dokona mendemepe mende larami ingya napyo.  
Dee kamame mendaki mendeme pii nambana piso sipunu dokona isingi yano pyakamarami ingya napyako.
- 29 Bange anatuŋu letaminyi dupwa mee ingyuo pelyamo.

Nakamame yulu mendepe pirami ingya nalyamo.  
 Mee bange isa kanapeme wasisi dapwa pyuku lasi nakama keta  
 porainya renge mende pali nalyamoko, leya.

**Kamongona Kendemande Doko**

- 42** <sup>1</sup>Kamongome lao,  
 Nambana kendemande nambame baa porainyi pyambungi.  
 Nambame baa rombo palyapala baa kando raeko maingi.  
 Baa keta nambana imambu dokome maralyiyu.  
 Dokopa baame wambu rara peparae yulu rolae dokona polo lamaira.
- <sup>2</sup> Baame pii porakai ketae palyuo laa nara.  
 Dee yuu taone dupwana kata dupwana pii rekyae lao lao kara nara.
- <sup>3</sup> Baame angi kwaeyamo doko kokwa see nara.  
 Dee lambe kuki rao seramo doko kunjinyi nempa nara.  
 Baame pii lao rolenge kulisa ingyuo sulu singi doko wambu keta  
 palyara.
- <sup>4</sup> Baame keyange mende piraŋa lao soo manji nyepala karara.  
 Baame isa yuunya lao rolo lenge renge doko minyalyara.  
 Yuu nanesa range dupwame banya mana pii doko langinya lao mata  
 kui lapala isaro karaminyi.
- <sup>5</sup> Anatu baame yake doko pyuo wasapala minyuo panguya.  
 Baame isa yuu dake pyuo wasapala dokona lenge renge bange soo  
 pelyamo dupwa pyuo wasiya.  
 Baame wambu dupwa poporambaiye pyambuo lete renge maiyuo piya.  
 Dokona lao dakepa Kamongo Anatu dokome banya kendemande  
 akali doko lamaiyuo lao,
- <sup>6</sup> Namba Kamongo dokome emba kee lapala  
 isa yuu dakena lao rolare ingyaraŋa lao porai renge jiyu.  
 Emba keta nambame wambu peparae pipya kana minyuo lalu lao  
 lenge pii laro.  
 Emba ketako nambame wambu rara peparae dupwa keta yanga  
 paupau lanyi pyambwaro.
- <sup>7</sup> Embame lenge koo dupwa lenge ranyi reto  
 dee karapusi ingyuo iminjinginya petaminyi dupwa kiiramo nyuo  
 piri ingyara.
- <sup>8</sup> Namba iki doko embena Kamongo Anatu.  
 Bange anatu lenge dupwa namba kingi lenge dokona role pyao laa  
 narami.  
 Nambame kingimi wasisi dupwa nambana lakandenge panda  
 dokona lakandena lao panda serakami nara.

9 Renge lapo dopa pyuo paralyamo lao wambo pipa nayamopa  
langiyunu dupwa dakepa kinyi angingyuo pipiyamo  
kandelyaminyi.  
Enenge piramo dupwa  
kamame wambo pipa naramopa dakepa nambame langiruwale.

#### Kenane Lakando Pingi Doko

- 10 Kamongo kando kenane enenge pyalapape.  
Yuu muu peparaena wambu dupwame baa lakando kenane  
pyalapape.  
Nakama lapo ipwa kotana piso papiyaminyi dupwame baa  
lakandalapape.  
Ipwa kota dupwana lete bange silyaminyi dupwame baa  
lakandalapape.  
Yuu nanesape dee dupwana wambu palaminyi dupwa peparaepeme  
kenane pyalapape.
- 11 Yuu muiyanepa taone dokona singipi dupwame Anatu lakandena.  
Wambu yuu Keta rangeme baa lakandena.  
Dee yuu taone Sela range wambupi dupwame  
yuu kyau ketae dorena karo rae wakasa maiyuo pii porakai lao baa  
lakandena.
- 12 Yuu nanesa range wambu  
nakamame Anatu baa kamame ulupili dokona lakando palyuo pena.
- 13 Kamongo ami yanda singi porai paka nao kyawame suu lao yanda  
pela panya karengenyili piru karamo.  
Baa yanda pinya mata kui lapala rapa rapa piru karamo.  
Baame yanda lakana lao pyuo karamo.  
Banya porai renga doko dopakaleje lao yanda pimwai dupwa pyao  
lasaka pira.

#### Anatumi Banya Wambu Dupwa Nyisaro Lao Lalo Lao Leya

- 14 Anatumi lao,  
Yuu gii andarele namba romo napyuo kareyo.  
Nambana wambu dupwa kando yano pyao pii mende lamai nayo.  
Dopa piyunupape epapu yuu gii angi mende piru doko epelyamo.  
Doko nambame enda wane mata pilyamo ee lenge dopale ingyuo ee  
lao karo.
- 15 Nambame yuu kyau kuki epengepe dupwa pyao kokwa sinyi nembo  
karo dokopa  
isako isape dupwa yanda nanyi pyambwaro.  
Dopa pyuo yuu lama lamana ipwa epenge dupwa muiyane penda  
penda ingyuo nembo

dee ipwa pete dupwa sokwanyi nembo piru.

- 16 Nambana wambu lenge koo dupwa kata laminyaronopa  
nakama kata wamba kando paa nange kyakasa dupwana pao  
kararami.  
Dopa pyuo nakama iminjinginya petaminyi doko yanganyi reto  
nakamana lenge kambu dorena yuu pulyuo lupyuo pingi dupwa  
pyao rambikwanyi reto piru.  
Doo leto dapwa nambana lalu lao lenge pii letojo.  
Nambame yaki nyerono kando lao minyaro kararo.
- 17 Wambu lapo mee bange anatu dupwa mona maiyuo  
dee isa kanapeme anatu yale ingyuo wasapala nakamana anatuju  
letaminyi dupwape  
peparae isale ingyuo karo elya renge nyerami.

#### Israele Wambu Dupwa Mana Nyii Nao Isa Peyami

- 18 Kamongo dokome lao,  
Kalepoe wambu dupwa selapa.  
Nakama lenge koo dupwa repeta suu lao kandalapa.
- 19 Nambana kendemande lenge koo ingyapyamopape kamame lenge  
koo mende karase?  
Dee nambana wai pii minyakao pena leyono akali doko kalepoe  
ingyapyamopape mendali kalepoe mende karase?
- 20 Israele nakama angi malu mee piyamo kandami.  
Kandaminyipape dokona aki renge mende mana nyilyamisi?  
Nakama kale kata sepala pii silyaminyi.  
Siminyipape aki renge angi doko soo nyimisi?
- 21 Kamongo Anatu baame wambu kyawa lete nyelana suu pyao mona  
nyilyamo.  
Dokona lao banya mana piipi mawa piipi dupwa ketae nembo  
banya wambu dupwame rape rape lamili lao suu piya.
- 22 Dopa lao suu piyamopape wambu rara wakale dupwame Israele  
wambunya yuupi bangepe pyao kokwa soo waa nyiyami.  
Waa nyepala nakamame Israele wambu dupwa karapusi palena lao  
kii palyuo yalu piyami.  
Dopa piyaminyipa mendeme nakama kyawa lete nyela eparami  
ingya naya.
- 23 Nakama mendeme pii dake sakamiramisi?  
Dakepa piso pao rengya nakama mondo lao seramisi?
- 24 Israele wambu dupwa apimi yanda pimwai dupwa keta maiyase?



Doko Kamongo kando yanda pimwaiyuo koo piyamano dokome maiya.

Namwa baame piso palyuo pimili laope panda banya mana pii simili lao suu pyapyamo kata doko yaki nyuo kaeyamanosa Kamongome namwa yaki nyiya.

25 Dokona lao baame namwa banya imbu singi porai doko nakanjo soo kandalapase lao piya.

Dee yanda porai wakasa dokona randa nyelapase lao piyako.

Banya imbu singi doko Isaraele peparae keta isare ingyuo raeyo reya.

Dopa piyamopape doo piyamo doko soo nyii nayama.

Namwa doko mende pyamo lao soo nyii nayamako.

### Anatumi Banya Wambu Dupwa Kiiramo Nyero Lao Lalo Lao Leya

**43** <sup>1</sup> Isaraele wambu dupwa, nakama wasiyamo Kamongo Anatu dokome lao,

Nambame nakama kyawa minyarono paka nalapape, letamo.

Nambame nakama kingi leyono. Nakama nambana angingyuo karaminyiji.

2 Nakama ipwa rapu koko kyuwa dupwa yalo paraminyi dokopa namba range nakama role kararo.

Nakamana randa dupwame nakama kapa nyuo anamasi minya nara.

Isare rao kararamo dupwana sukusa parami dokopa nakama isare dokome kapa raa narami.

Dee makande pingi andake dupwa nakama keta eparamo dokopa randa nyii narami.

3 Namba nakama Isaraele wambunya Kamongo Anatu poo pyasi nakama kyawa lete nyingi doko.

Nambame nakama mona seramo karalapase lao Isipi wambu dupwa kyawa yaki nyuo nakama kiiramo nyero.

Dee namba Itiopia wambupi Sepa wambupi opetae kyawa yaki nyeroko.

4 Nambame nakama pipya mona reto dee ketae pyambuo pilyu.

Dee nambame nakama moname nyuo rungi rungi pyapunu karaminyi.

Dokona lao nakama kyawa lete nyuo wambu peparae yuu lapona palaminyi dupwa kame soo kyawa yaki nyero.

5 Namba nakama role karonjo dokona paka nao karalapape.

Nambame neta pyakaenge dorena pisowape dee neta yalyingi dorena pisowape

nakamana wambu dupwa range nyuo anda lanyoko eparo.

- 6 Dopa pyuo karaminyi dokopa yuu dulurena wambu dupwa lamaiyuo dokopa nambana wambu dupwa kakaso pena kaeyakana laro. Dee donorena wambu dupwa lamaiyuo dokopa penalenje minya sili sili laa nana lao piru. Dokopa kamame panda lao saka nange yuu muu wakale wakale dupwana naneta kararaminyi dupwape dee yuu muu peparaee kipwa kipwa dupwana kararaminyi dupwape andako kili kali pyuo epena.
- 7 Nakama namba rangena wambu. Nakamame nambana kingi andakinyi nembo yulu pirami lao nambame nakama wasiyu.

**Isaraele Wambu Dupwa Kamongona Usinisi Ingyuo Pii Leyami**

- 8 Anatumi lao, Nambana wambu dupwa kote lala epena lao lamailapape. Nakama lenge rao karaminyipape lenge koo ingilyaminyi. Dee nakama kale kata siminyipape kalepoenge ingilyaminyi.
- 9 Yuu muu peparaena rara dupwa api mende porailyamo doko makande pyuo kandala epena lare. Dopa pirinyi dokopa nakamana mee bange anatu dupwana api mendeme rengya piramo dupwana larase? Dee nakama dupwa anjuku mendeme dakepa pyaka silyamo dupwa dopa pirana lao leyase? Mee bange anatu dapwame nakama kinyi angi rolae leyamiŋi lao lakarami usinisi dupwa lanyuo epena.
- 10 Isaraele wambu dupwa nakama nambana usinisi lakarami. Namba nakamame soo nyuo suu pyao dee namba Anatu mendaki iki lao serami lao nambame nakama nambana kendemande wambu ingyuo rombo palyiyu. Namba iki Anatu karo. Anatu wakale mende kara nalyamo. Dokonako ingyuo wamba mende kara nange. Dee rengyape mende kara narako.<sup>n</sup>
- 11 Nakama lete wai pyao nyeramo Kamongo doko nambako iki karengi.
- 12 Rengya nyera dupwana see nao kareyaminyi dokopa dopa piralyamo lao langingi. Langipala dee paki kata palipala nakama nyiso epenge kandape.

<sup>n</sup> 43:10 Kamongo doko nambako iki karengi. (43:11)

Doko suu pyao yuu pandape wakale dupwana mee bange anatu  
mendeme dopa pyuo pingiŋi leyaminyi see nayami.  
Dokona lao nakama nambana usinisi ingyuo karaminyi.  
13 Namba Anatuŋu lao leto doko mee karengenyili pyuo kararo  
ingyapyasa leto.  
Mendemepe nambana porainya renge doko wanja narami.  
Dee nambame pingi lengepe dupwa mendeme kapa alowa pii  
naramiko.

### Yuu Babilone Dokona Karo Nyisa Kiiramo Eparami

14 Isaraelena Anatu poo pyasi nakamana Kamongo nyiso kyawa lete  
nyingi dokome lao,  
Nakama nyiso kyawa lete nyuo nambame ami yanda singi dupwa  
yuu Babilone pyala pena lao peyaro.  
Nambame yuu taonena kame kambu dupwa pyao lalyapala  
dee Babilone wambu pii poraiyuo lao mambo pyao karaminyi dupwa  
dee nyuo ee lena lao piru.  
15 Namba Kamongo doko nakamana Anatu poo pyasi ingyuo karo.  
Nambame nakama Isaraele wambu dupwa pyuo wasiyu. Wasapala  
namba nakamana kinji ingyuo karo.<sup>o</sup>  
16 Yuu wamba dokopa ipwa kota pete pyao karalyiyamo dokona  
Kamongo dokome kata wapuo reteya.  
17 Baame ami yanda singi poraiipi uliuli mename ipilyamo piso  
papingipi mena osepe peparae  
pyao kokwa soo nembo oteya kande.  
Nakama isa paleyaminyi doko lambe puku lapala kunjapala raa  
nalamuli pyuo  
nakama kamba lete sipurao epa nao isa palu palyuo paleyami.  
18 Dopa piyamopape Kamongome lao dokopa  
wambowana piyunu dupwako paka pyao soo lao kara nalapape.  
19 Nambame yulu enenge lapo piru ingyiyamo dokona kandaro  
karalapape.  
Doko dakepa lapo pilyamo dupwa nakama angi kandelyaminyi.  
Namba yuu muiyane dokona kata wapwakaro.  
Dee dokona ipwa guu lao epena laro.  
20 Nambana rombo palyuo nyiyunu wambu dupwana lao  
yuu muiyane dokona ipwa endangi palyuo epo karena lao mairunu  
dokopa

<sup>o</sup> 43:15 Ipwa kota pete pyao karalyiyamo dokona Kamongo dokome kata wapu reteya.  
(43:16)

yaka kameyape yana suwa kararopepe mena rae lengepe dupwa  
peparaeme

kandapala nambana kingi ketae pyambu lakandarami.

- 21 Nakama nambana wambu namba rangeme wasiyunu petaminyi  
dupwame  
namba lakando kenane pyarami ingilyamo.

### Isaraele Wambunya Koo Dupwa

- 22 Kamongo dokome lao,  
Dopa piyunupape Isaraele wambu nakamame nambamoo pipya  
makame kumapala namba lakanda nayami.
- 23 Nakamana mena sipisipi kiso jingi doko kaeyami.  
Nakamame mena pyao kiso joo nambana kingi lakanda nayami.  
Nambame dopa pyuo kiso jipa lao mona kendanyi pyambu piso see  
nayo.  
Dee parali angae lao rendamu pingi jipa lao piso see nayo kande.
- 24 Nakamame rendamu pingi bange lapo ropo pyao nyaka nayami.  
Dee mena kapa rukisipi kiso jiminyi namba sikya pipyamo karonde daa.  
Dopa pii nayaminyipape nakamame koo pipala namba mona  
kendanyi pyambu kareyami.  
Nakamame kopetame pyaminyi dokome yame yame lany pyambu  
karo piyami.
- 25 Dopa pyuo kareyaminyipape namba Anatu dokome nakamana koo  
renge dupwa nyuo kame sakao karo.  
Doo pilyu doko nambaŋa lao sepala dopa piru, leya.  
Nakamana koo dupwana suu pingi nyepala minyuo karo nakama  
pipya yanda pimwaiyuo yango palya naro.
- 26 Nakamana pii larami dupwa minyuo epo dokopa kotena minyuo pao  
lamanale.  
Embena pii angi palamo doko lamairinyi dokopa emba rolae doko  
panenale.
- 27 Nakamana akali kyawa wamba kanda soo kareyamo dokome koo piya.  
Dee nakamana akali mupwa dupwame koo pyamiko.
- 28 Nakamana akali isingi dupwame nambana tembole anda kokwa soo  
kwaenyi nembeyami.  
Dokona lao nambame Isaraele wambu dupwa keta randa maiyuo  
nakama namba rangena wambu dupwa elya nyinya lao pyuo piyu.

### Kamongo Doko Baa Iki Anatu Ingyuo Karamo

**44** <sup>1</sup> Kamongo dopa letamo.  
Isaraele wambu nambana kendemande

- nambana rombo palyisi Jekopena para pyao nyisi dupwa epapu pii dake selapa.
- 2 Namba Kamongo dokome nakama wasiyu.  
Nakama ene nyaŋa manjo nyiyami dokona piso nambame nyiso epeyo.  
Nakama paka nalapape. Nakama nambana kendemande wambu.  
Namba rangena rombo palyiyu dokona nambame mona retelyo.
- 3 Nambame yuu oo lasi dokona rombe lanyi pyambwakaro.  
Yuu kulisa pao yando nasi dupwana ipwa guu lanyi pyakamena lao piru.  
Dopa pipala nambana porai renge doko nakamana wane wanakepe dupwa keta kulimbwanyu peyaro  
dee nakamana para pyao paraminyi dupwa elyape keta pisakaro.
- 4 Nakama andaramisa yanenge dupwa ipwa epo pengena isoko mokwame isape andele lapala puiya nongopa soo karara.
- 5 Dokopa mendaki mendaki lao wambu dupwame lao, Namba Kamongona wambu karo lao epo  
Isaraele wambu pipya konda konda pirami.  
Dopa pipala wambu mendaki mendaki lao nakamana kingi sukuli dokona Kamongona kingi pyanyi palyarami.  
Palyapala baa range Anatunya wambu dokona mende karo, larami.
- 6 Kamongo baame Isaraele wambu dupwa iso kyawa minyuo kareng doko  
Kamongo Porai Wakasa dokome pii dake palipyasa lalana letamo.  
Kama wambowana nambako kareyo doko lumwa pyuo dokopa namba kararoko.  
Anatu mende mendasa kara nange. Anatu doko nambako iki kareng.
- 7 Mendeme namba piyunu dopale piyamende karase?  
Api mende ene kanda soo dokona piso yuu gii lumwa piramo dupwana  
dopa pirana lao leyamende karase?
- 8 Nambana wambu dupwa nakama paka nalapape.  
Wamba kanda soo dokona piso pao dakepape  
rengya nyera dorena polo lenge kandapi dokona  
nakama nambame dopa pyuo lengenje lao usinisi lakarami ingilyamo.  
Anatu mende wakale karase?  
Anatu mende wakale porai renge palengende kararamo sepa nayonde ramo kandena.

### Kingimi Wasisi Dupwa Anatu Angi Daaja Lao Panelyamo

<sup>9</sup>Wambu isa kanape kingimi imambuŋu lao wasilyaminyi dupwa keyange angi ingya nalyamopa mee bange anatuŋu lao mange karelyaminyi dupwa mee ingyuo para ingilyamo. Wambu dupwame anatuŋu lao mona maiyuo lakandelyaminyi dupwa lenge kwaeyo sepa napala letaminyi dokona elya nyerami ingilyamo. <sup>10</sup>Kana ane palenge dupwame kingi kokwa soo wasapala anatu ingyuo kingi lao kararami doko kapa ingya nalyamo. <sup>11</sup>Mendeme mona maiyuo kingi wapambupi lakao lao pisarami dupwa mee elya nyerami ingilyamo. Isa kana dopa pyuo wasarami wambu dupwa mee isa wambu ingyapala renge mende pali nalyamo. Nakama kote dokona nyuo epena lao panda maiyuo laramanopa randa nyuo pako elya nyinyale.

<sup>12</sup>Kapame pyuo wasingi akali dokome kapa kunjasi mende nyepala isarena yango wasara. Banya kingi porai dokome ama minyuo pyao ponga lyuo lenge kambu waso nyingi. Dopa pyuo yulu pipala makame kumuo lopo ipwa nano pingi.

<sup>13</sup>Kamondame isa angi doko makande pyuo kandenge. Kandapala banya makande isa dokome wambu yalende lenge kambu keyange inginyi pyambu rombo palyuo wasingi. Pipala wambu yale doko lanyuo epo banya anda dokona retenge. <sup>14</sup>Dopa pyuo dokopa baame sita isa kameya dupwa poko nyuo isa oke panda saiperese isape imwa dokona karapyamo dupwa koto pao yapo nyilyamo. Dopako pyuo yuu lapo lorele isa dupwa wara pipala apunda dokome andena lapala mali soo kareng. <sup>15</sup>Akalimi isa dokonako nyepala pakirena dorena isarena yangapala soo piso borete minyuo yango pingi. Dee pakirena dorena anatuŋu lao wambu yale wasapala kingi wapambupi lakao kingi lenge. <sup>16</sup>Isa dokona lapo mee isa yangapala dokona mena minju ketae kiso napala sikya pilyamo kareng. Baa range isare soo isasa pilyamo dokopa lao, Isare keyange doko silyuŋu isale lenge. <sup>17</sup>Isa dolo silyamo dupwame mee bange anatuŋu lao wasingi. Wasapala kingi wapambupi lakao kingi lao atenja pyao dokopa, Emba nambana anatuŋu embame namba kyawa lete nyepe, lenge.<sup>p</sup>

<sup>18</sup>Wambu doo nakama yale doko angi mende pilyamanoko lao kopyali ingyuo karo aki pilyamano lao see nange. Nakama lenge raa nao ayemba suu pipala pyuo karo kinyi angi doko kanda nange. <sup>19</sup>Isame anatuŋu lao waso kareng akali dokome lao, Isa lapo mee yango lapome borete yango waso dee mena minju yangapala nao pyuo dokopa silyamo dupwame anatu ingyuo wasapala mee isa dokona kingi wapambupi lakao piso dokopa isa dokona lao kopyali ingyuo pyuo lao karalyano lao suu pyao laowape pii nange.

---

**P 44:17** Mee isa dokona kingi wapambupi lakao piso. (44:19)

<sup>20</sup> Isareme raramo sungwa lengya doko nyuo mona palya napala narama ingya nalyamo. Banya suu pingi kopyali dokome baa nyuo isoko kata nembapyasa apa pilyu lao see nalyamo dokona mendeme nyisarami ingya nalyamo. Baa rangeme sepa napala bange kingi rakana minyuo karamo doko anatu angi daanja lao meelyamo lao soo nyii nalyamo.

**Kamongo Bange Peparae Wasiya Baa Pyuo Nyingi Ingyuo Karamo**

- <sup>21</sup> Kamongo dokome lao,  
 Isaraele nakama renge dasipa suu pyalapape, letamo.  
 Doko nambame nakama nambana kendemande ingyuo kararami lao wasiyu.  
 Nakama nambana kendemande ingyuo karaminyi.  
 Nakama kame soo yaki nyeronde daa.
- <sup>22</sup> Nambame nakamana koo dupwa kopa apupi pyao nembele lao kwuanyi nembakayoŋo.  
 Nambame nakama lete wai pyao nyilyuŋu. Namba range karo dakena ipupwape.
- <sup>23</sup> Kamongome banya yulu andake pyuo lasaka pyuo banya Isaraele wambu dupwa nyiso pyuo lete nyiya dokona nakama yake panda dorenape isa yuu rapunya palenge dupwape dee imwa isape yuu kyaupi dupwa nakama pii ketae palyuo lao rae maiyuo karalapape.
- <sup>24</sup> Namba Kamongo doko nakamana pyuo nyingi akali.  
 Nambame iki nakama wasiyu.  
 Nambameko Kamongo ingyuo karapala bange silyamo dupwa peparae wasiyu.  
 Nambame iki yake doko nyuo pyasinju lanyi reteyo.  
 Dopa pyuo isa yuu dake wasiyuŋu dokopape mendalimi namba nyiso kara nayako.
- <sup>25</sup> Nambame wambu lapome mali mali sakange dupwa kopyali ingyuo letaminyi lao pyuo lasaka pingi.  
 Nambame wambu bui dupwa dopa pira dapa pira lao isaro karengede dupwa uki minyuo nembakamingi.  
 Akali soo nyinginya pii dupwa pyao isa nembakamyuo nakamana mona palenge singinya renge dupwa kopyali ingyuo pelyamo lao lasaka pingi.
- <sup>26</sup> Dopa pipyamopape nambana kendemande dupwa rengya mende piranja lao lenge.

Nambame wai pii minyakange akali dokome nambame mende  
rengya piruŋu lao rapa rapa pyuo retenge doko pano lakale  
peenge.

Dopa pipala doo ene rengya mende pira letono dupwape dee mende  
pinya rapa rapa pilyuŋu dupwape angi kinyi lao panenge.

Nambame Jerusaleme range wambu dupwa range epo dee  
paliraminyipa

Juta wambunya taone dupwa kamba range piramiŋi leto.

Taone dupwa lalyuo kwaeyasi doko minyalyuo pirami ingyara,  
namba dopa pyuo leto.

27 Ipwa kota andake dupwa sokonya laronopa mee sokwara.

28 Nambame akali Sairose lamaiyuo, Embame nambana wambu dupwa  
isakao kara, laro.

Namba pinya suu pilyu dupwana palyuo pyakare.

Jerusaleme doko dee kamba minyalyinya lakare.

Dopa lao dokopa tembole anda pirami dokona puu rombo minyakao  
susa isa retako pinya lao lamaikare, lapusa pilyamo.

#### Kamongome Kiŋi Sairose Rombo Palyiya

**45** <sup>1</sup>Kamongo dokome akali Sairose baa kiŋi ingyuo  
yuu liti wakale dupwa pyao anamasi minyinya lao rombo palyiya.  
Baame kiŋi yango dupwana pawa dupwa pyao kui lao isa palyala  
pena leya.

Kamongo yuu taone dupwana kame kambu dupwa banya lao pyao  
lumbwany retakamira.

Sairose kando Kamongo lao dokopa

2 Embena lao namba rangeme kata rapa rapa pyakao  
yuu kyau kuki andakepe pyao kapa kapa pyuo retaro.

Nambame kana koneme kambu wasingi dupwa pyao lalyaro  
dee ane isa porai dupwa roo pyao muu muu pyakaro.

3 Nambame kamongonge bange wakale iminjinginya yalu pyuo singi  
dupwa emba jero.

Dokopa emba namba Kamongoŋo lao soo nyuo  
dee Israele wambunya Anatu dokome emba kingi lao kee  
lapyalamo lao soo nyere.

4 Israele wambu nambana kendemande dupwa namba rangeme  
rombo palyuo nyiyunu dupwa

embame nyisakare lao emba rombo palyilyu.

Embame namba soo nyii napinyipape

namba emba kingi ketae pyambuo rape rape lao karapu.

5 Namba iki Kamongo. Anatu wakale mende kara nange.



Embame namba soo nyii napinyipape  
nambame emba yano piramo kararene dokopa porai renge jero.

6 Wambu peparae

yuu muu pinjingi paki piso pao paki suu lao dupwame  
anatu wakale mende kara nange.

Namba iki Kamongo lao soo nyerami lao dopa piru.

7 Nambame yangange iminjingipi dolapo pyuo wasingi.

Nambameko elyape keta pisingipi dee randa maingi rengepe dolapo  
peenge.

Namba Kamongo dokome yulu dasipa pingi.

8 Nambame yake dokona piso apunda epengenyili pyuo rolaena renge  
peyaro.

Isa yuunya wambu dupwame lenge pee lao nyelana kararami.

Dopa piramo dokopa isa jingi kalya pingi lokwa sinyi peenge dopale  
ingyuo kiiramo nyingipi pii soo rolo lengepe peyakamiru.

Doko namba Kamongo dokome dopa pyuo pinya laronosa pira.

**Kamongo Isa Yuu Wasapala Ee Kana Peparae Iso Kareyamo Doko**

9 Penge warame wasisi lapo serami dupwanako yale mendeme  
akali pee wasaramo doko kando apiyanda pyuo larase.

Dee wara dokome akali doko kando apa pipyasa dopa pilini lao piso  
serase?

Penge dokome akali wasaramo doko kando emba mora pisa nange  
lamo lao mumu larase?

10 Mendeme banya endangi rakangepe kando piso sokondali pyuo,  
Akipamo embame namba lenge kambu dopale ingyuo manjo nyiisi?  
larase?

11 Dokona lao Isaraele wambunya Kamongo Anatu poo pyasi  
rengyana nyera dupwana singi dokome lao,

Nakamame nambana wane wanake dupwana lao namba piso soope  
dee dopa pyuo piri laope namba langirami ingyua nalyamo.

12 Nambame yuu doko wasapala dokona

wambu rara dupwa palena leyo.

Nambana porai renge dokome palepeta pyasinju leyo dokopa yake  
doko pee leya.

Nambame renge palyuo neta kana buipi panda range dokona karena  
lao rapu pyuo karenge.

13 Nambame Sairosena mona doko pyao kui laronopa

nambana yulu dokona pyuokondali pyuo yulu kwaeyaramo dupwa  
rolae ingyuo retara.

Nambame baa nyiso kata dupwa peparaena paramo dupwa wapuo  
rolae ingyuo retaro.

Dokopa baame nambana taone Jerusaleme doko dee pipala  
nambana anjisi wambu dupwa kiiramo nyera.  
Mendeme baa bange mairuŋu yulu pyakana laope dee panga soo  
kana maiyuo nyepala yulu pinya laope pii nara ingilyamo.  
Kamongo Porai Wakasa dokome lapyamo pilyamo.

- 14 Kamongome Isaraele wambu dupwa lamaiyuo lao,  
Itiopia wambupi dee Isipi wambupinya mena bangepe dupwa  
nakamana ingyara  
dee yuu Sepa akali londe dupwa karapusi ingyuo karo nakamana  
yulu pakao kararami.  
Karapala nakama puu maisi karo nakama moko minyuo  
paeyarami.  
Dopa pyuo karo nakamame nakama kando pangu soo karo  
Anatu nakama pipya role pyao karamo doko baa iki Anatu angi lao  
polo larami.
- 15 Isaraele wambunya Anatu banya wambu dupwa lete pyuo nyingi  
doko  
baa range yalu yalu pyuo karengé.
- 16 Wambu isa kanapeme anatuŋu lao wasilyaminyi dupwa  
mende neta paa nao elya nyerami.
- 17 Dopa piraminyipape Isaraele wambu dupwa Kamongome lete pyuo  
nyilyamo doko  
soo puu para ingilyamo.  
Dee banya wambu dupwa kamame elya reŋge nyii narami.
- 18 Kamongo dokome yake doko wasiya.  
Doko baa ikiko Anatu karamo.  
Baame yuu doko see nayamopa pyuo ingiya.  
Baame kandokondali pyuo wasapala sulu seraŋa lao piya.  
Baame yuu muiyane penda penda ingyuo mee soo paraŋa lao  
wasiyande daa.  
Yuu doko wambu paliramiŋi lao piya.  
Dopa pyuo wasiya dokome lao, Namba doko Kamongo.  
Dokona Anatu wakale mende kara nange lao letamo.
- 19 Nambame pii yalu pyuo laa nao  
mende pinya dokopa kalyama nange.  
Isaraele wambu dupwa yuu muiyane nenge anda nange dokona  
namba kotala pena laa nayo.  
Namba Kamongo dokome pii kinyi lenge  
dee aki mende rolae ingingi dupwa soo nyepala karena lao  
lamaingi.

**Yuu Muu Dupwa Peparaena Kamongo Dee Babilone  
Wambunya Mee Bange Kingimi Wasisi Dupwape**

- 20 Kamongo dokome lao,  
Nakamana yuu liti wakale wakale dupwa pyao kokwa soo  
nembeyaminyipa  
wambu lapo kyawa lete nyisi karaminyi dupwa epo nyuo pyaselapape.  
Kote letaminyi dokona nakama ipupwape.  
Wambu nakamana mee bange isame wasisi dupwa kalya pyuo pao  
dee mee bange anatu lenge nakama kyawa lete nyii narami dupwa  
kando loma silyaminyi dupwa  
rengeni doko soo nyii nange dupwa nakama peparae eparami,  
letamo.
- 21 Nakamana kote pii palamo dupwa minyuo kotena ipupwape.  
Wambumi nakama nyiso letaminyi dupwa mendeme mende pisalya  
pisana pyuo lena.  
Rengya mende piraŋa apimi wambo nolakao leyase?  
Doko namba Kamongo Anatu banya wambu dupwa nyiso kyawa lete  
nyingi dokomeko leyo.  
Anatu wakale mendepe kara nange.
- 22 Dakepa yuu muu peparaena wambu palaminyi dupwa  
nakama namba keta kapu kyuo epapala range kyawa lete nyelapape.  
Anatu doko iki namba karo.
- 23 Nambana lalu lao lenge doko angini kinyi dokona  
dee alowa pii naro.  
Namba keta kana minyuo lalu lao lao,  
Wambu peparae nambana lenge kambu dokona epo wapambu pii  
pyaro piso lalu lao lao,  
nakama namba kando rape rape lao yulu poraiyuo pyakarama lao  
larami, leyo.
- 24 Nakamame lao namba keta iki anamasi minyuo wini pingi reŋepe  
dee porainya reŋepe dupwa  
kando nyerama ingilyamo larami.  
Dopa piraminyipape wambu lapo namba kando epe kanda  
nalyaminyi dupwa randa andake nyuo elyame kumuo kararami.
- 25 Namba Kamongo dokome Jekopena para pyasi dupwa peparae  
kiiramo nyeronopa  
nakamame namba lakando kararami.
- 46** <sup>1</sup>Yuu Babilonena mee bange anatuŋu lenge dolapo pyao kokwa  
soo nembo ote piya.

- Wambu dupwame Belo Nepopa yuu gii mendaki  
 lakandepeyaminyipape  
 nakama mena dongena mata dokona nyuo retapala manjo peyami.  
 Isa kanape anatuŋu lenge dolapo kenda pingi dokome mena dupwa  
 kendo yame yame leyamo manjo peyami.
- 2 Anatu lao kyambo lasi dolapo range kyawa lete nyuo neta epena  
 saka nayambi  
 range karapusi anjisi pelyambinyi.  
 Dopa pipala yuu Babilonena mee bange anatuŋu lenge dolapo pyao  
 kokwa soo nembo oteya.
- 3 Isaraele rara dokona rembe nanao palaminyi  
 Jekopena para pyasi dupwa nambana pii dake selapa.  
 Nakama romba anda paleyaminyipape dee manjinyi peyaminyipape  
 nambame rapu pyuo karo andanyi pyambuyu kande dokome letoŋo.
- 4 Namba nakamana Anatu doko.  
 Nakama epapu piso pao nakamana kyawa yaku eparamo dokopa  
 alemo ingyuo karaminyi dokopa  
 nambame wasiyunu dokona yaki nyii nao lanyuo papyuo karo pao  
 kyawa lete nyuo kararo.
- 5 Api mende namba yale karapyandeme makande pyuo nambapa  
 manda manjirase?  
 Namba yale mende mendasa karase? Kamongome dopa letamo.
- 6 Wambumi kana palyingi nyuu dupwa lumbwanyi karalyapala kana  
 golo dupwa mee male male lao nembo  
 nakamame kana kulingi sikyali dokona piyami.  
 Dopa pipala kana golome wasingi akali dupwame anatuŋu lao  
 wasinya lao  
 kingi wapambu lakao dokonako suu pyao misi lao karengepya.
- 7 Nakamba anatuŋu lenge bange minyalyapala lange dokome soo  
 anda papala  
 banya singi mare dokona retenge.  
 Retenge dokopa romo pii nao sulu soo singi.  
 Mendeme nyisinya lao piso soo loma singi ramo dokopa romo  
 napyuo pii isingi laa nao  
 dee randa nyilyamo dokona kyawa minya nangeko.
- 8 Koo pingi wambu dupwa nakama namba mende piyunu doko apa pii  
 lao  
 dee kamba suu pyao pinginya nyuo manjipwape.
- 9 Yuu wamba yulu lapo piyamo dupwa suu pyalapape.

- Namba iki Anatu angi doko.  
Dee wakale mende namba yale manda minyuo mende mendasa  
karapyamo kara nalyamoŋo lao soo gisalapape.
- 10 Ene pirunu dupwana wambo kanda soo dokopa polo lao oteyo doko.  
Nambame yuu wamba leyono dupwa pipala kaeyaro.  
Nambana mende pinya lao rapa rapa pingi doko isa paa nange.  
Dee nambame mende renge palyuo pirunju lenge doko kaeya nao  
peparae pipala kaeyaro, leyo.
- 11 Nambame akali yuu neta pyakaenge dorena range mende epena lao  
kyakale leto.  
Baame yaka ulisapu rendamu nyepala lupyuo epengenyili pyuo  
waiya lao lupyuo isa epapala  
nambame rapa rapa pinyi reteyonoli pyuo pyuo otara.  
Nambame leyo doko angi leyonoli pyuo pira.
- 12 Mona kana pokapala nakama simbi simbi pingi wambu dupwa  
nambana mata kyakao nyeronon renge doko nanesale silyamo lao suu  
pyao karaminyi dupwame kale yukupala selapape.
- 13 Namba pyao mata kyakao nyero yuu gii doko oo repeta minyuo  
epelyo  
panda londesa see nalyamo.  
Nambame anamasi minyuo pyuo nyero yuu gii doko oo repe repe  
pyuo retelyo.  
Nambame yuu taone Jerusaleme doko nyiso pyuo nyuo  
Isaraele wambu dupwa dokome kingi ketae palyinyi nembaro,  
leya Anatumi.<sup>9</sup>

**Isaraele Wambu Dupwa Kamongona Kendemande Ingyuo  
Rara Peparaena Kendalina Mendeke Kararami**

- 49** <sup>1</sup>Wambu yuu muu ree lao nanesa palyuo pelyaminyi dupwame  
nambana pii dake selapape.  
Doko yuu wamba namba manjipa nayaminyi dokopa  
Kamongo dokome namba banya kendemande ingyuo karareŋe lao  
rombo palyiya.
- <sup>2</sup>Baame nambana pii doko mora pisinyi pyambuyasa wua gelana  
mendeke ingyuo neya.  
Baa rangena kingi kape dokona namba reto lanyuo papiya.  
Baame namba walakana mendeke ingyuo

---

<sup>9</sup> 47:1-48:22 Rombo 47 dokona Babilone doko isa paramo dokona lao leyamo pii palamo.  
Rombo 48 dokona apa pyuo Anatumi yulu andake pyuo banya wambu kyawa lete nyingi  
dokona lao pii palamo.

rapa rapa pinyi sero pyuo wasiya.

- <sup>3</sup> Dopa pipala baame namba langyuo, Israele emba nambana kendemande.  
Wambu dupwame emba dokona kandapala namba lakandarami.
- <sup>4</sup> Nambame lao, Nambame yulu pipunupape mendena ketae ingyuo  
pwamoro, leyo.  
Nambame yongo kisinyi nembo nambana porai renge dokome yulu  
pipunupape  
angi mende pyuo kapa pali nalyo.  
Dopa pipunupape nambame Kamongo keta kamame pyuo  
pyamalyuo pilyu dokona  
baame yulu pilyunu dupwana yano jera.
- <sup>5</sup> Kamongo dokome namba manjipa nayami dokopa  
banya kendemande ingyapala Israele wambu dupwa sukusa sukusa  
pyuo nyuo kapu kyo lanyuo epare lapala rombo palyiyapya.  
Dopa pyuo Kamongome nambana kingi ketae pyambuo pingi.  
Yulu peparaena porai renge dupwa baa keta piso epenge.
- <sup>6</sup> Kamongome namba langyuo,  
Nambana kendemande akali doko emba yulu andake mende  
retakapunu silyamo.  
Embame Israele wambu kyawa lete nyisi karaminyi dupwa iki  
keyange ingyuo palyuo karalu karena lao piriŋi lao laa nalyo.  
Dopa piramopape wambu rara peparaena lambe mendeke ingyuo  
karalase lao lao rombo palyaro.  
Dokona lao yuu muu peparaena wambu nambana lete penge kata  
lasaka pirami ingilyamo.
- <sup>7</sup> Akali mende baa kando yuu liti wakale wakale range dupwame  
kilya kando awa nao karaminyi doko  
randa nao karo  
baa isingi akali mupwana kendemande yulu pyakamyuo kareng  
akali doko kando  
Israele wambunya Anatu poo pyasi lete wai pyao nyingi dokome  
dopa pira, letamo.  
Kiŋi dupwame emba kiiramo epare kandapala  
nakamame sipurapala rape rape lao kararami.  
Dee kiŋinya wane dupwame emba kandapala  
isa pangu soo embena kingi ketae pyambuo lakandarami, lamailyamo.
- Dopa pyuo para renge doko Kamongo dokome banya kendemande  
akali doko rombo palyiya.

Isaraele wambunya Anatu poo pyasi doko banya pii lalu lao lapala  
kaeya nange

**Jerusaleme Enenge Ingyuo Sera Doko**

- <sup>8</sup> Kamongo dokome banya wambu dupwa lamaiyuo,  
Yuu gii angi nakama lete wai pyao nyero doko pyaka seramo dokopa  
nambame nakama anjiki pyuo  
nyisa lao ee lao karaminyi dokona isingi yano pyakaro.  
Nambame nakama rapu pyuo karo konambe ingyaro kararonopa  
nakama keta wambu dupwa peparae kana minyuo lalu lao laro.  
Nambame nakamana yuu dakepa mee apa soo peelyamo dokona  
range piso palyuo pipwa, laro.
- <sup>9</sup> Nambame wambu karapusi palaminyi dupwa kando lao, Mee manda  
rasi nyisa pupwape, laro.  
Dee lapo iminjinginya petaminyi dupwa  
yanga paupau lengena epena lao piru.  
Dopa piru dokopa nakama mena sipisipi yuu kyaunya rambi nao  
mondo lao kareng dopale ingyuo kararami.
- <sup>10</sup> Nakama dee ipwa nanome kumuope lopome kumuope pii nalu  
narami.  
Mendeme nakama mona reto karapyamo dokome nakama lanyuo  
paramo dokona  
yuu muiyane dokona neta dokomepe isasa pingi dokomepe nakama  
rao rakusi raa nara.  
Baame ipwa guu lao epenge dupwanako lanyuo para.
- <sup>11</sup> Nambame yuu kyau dorena oko soo aewae kata ingyuo pyao  
retapala  
nambana wambu dupwa pena lao kata mende wapuo retakamiru.
- <sup>12</sup> Nambana wambu dupwa kaname nanesa piso eparami.  
Eparaminyi dupwa dulurena pisope neta yalyingi dorena pisope  
dee yuu taone Asawane yuu Isipi dokona donorena singi dokona  
pisope eparami.
- <sup>13</sup> Dokona yake pandana palaminyi dupwa kenane pyalapape. Isa yuu  
dokome rae maiyuo pii ketae palyuo lape.  
Yuu kyau dupwana piso kenane doko ipwa ingyuo langa  
kulimbwanyi peeyo epena.  
Kamongo dokome banya wambu randa nyuo karaminyi dupwa  
sakame kumuo  
mona minyarambu minyaro karara, leya.
- <sup>14</sup> Dopa leyamopape Jerusaleme wambu dupwame lao,

Kamongo dokome namwa kame soo kaeyo  
kyawa yaki nyilyamo, leyami.

15 Dokopa Kamongo dokome isingi lao,  
Endame wane banya rangena doko kame sepala kaengese?  
Banya wane angi mandenge doko mona reta nangese?  
Dokona lao kamame endangi dokome banya wane kame seramopape  
nambame nakama kame see nalu nao naro.

16 Jerusaleme nambame yuu mendepape nakama kame soo kaeya naro  
ingilyamo.  
Nambana kingi kape dokona nakamana kingi doko pyasi palamo.

17 Nakama dee minyalyuo nyerami dupwa oo repeta epelyaminyi dokopa  
nakama kokwa siyaminyi dupwa yaki nyuo kala parami ingilyamo.

18 Kamenge kara napala apa pilyamo lao paki pakipi kandarapu pyuo  
karalapape.  
Nakamana wambu dupwa anda epena elyambu pyuo epelyaminyi.  
Kinyi namba lete karalu karengi Anatu doko suu pyao  
nakamame nakamana wambu kandapala dokopa  
enda mapwaeme lyange mamakupi soo kalya pyuo akalinya anda  
pao rae maiyuo pamoli pyuo rae mairami ingyara.

19 Nakamana yuu doko mee kokwa soo peya kande.  
Dopa piyamopape epapu wambu malu palya epelyaminyi dokome  
yuu doko kuki ingyapala kete pyara.  
Nakama kokwa soo momo nao pinyi nembeyami wambu dupwa  
nakama yaki nyuo yuu nanesa wakale parami.

20 Yuu mendepa embena wambu karapusi karo mandeyami dupwame  
nakama kando lao,  
Yuu dake ama kuki lamoŋa.  
Namwa palyuo karo piramano panda lama kamame konda pyuo  
nyimwali aiya larami.

21 Dokopa Jerusaleme wambu palirami dupwame range lao,  
Apimi wane dupwa namwana lao manjo jiyape?  
Wane angi namwana dupwa nembo kaeyo epo dee manjirama ingya  
naya.  
Namwa karapusi ingyuo puu maiyuo nyuo minyuo wakale peyamini.  
Apimi wane dapwa wai kiso nyiyase?  
Namwa iki yeelyo yaki nyuo kaeyamini  
wane dapwa anja karo epeyamisi? larami, leya.

22 Kamongo Mupwa Andake Wakasa dokome banya wambu dupwa  
lamaiyuo lao,



Wambu yuu liti wakale wakale dupwa keta kongwalu mende pyuo  
lasaka pirunupa

nakamame embena wane dupwa minyakao anda eparami.

23 Kiŋi dupwa nakamana rakange dopale ingyarami.

Dee enda kuini dupwa nakamana endangi ingyuo parami.

Dopa pipala nakamame kingi wapambupi lakao pangu soo nakama  
lakando ketae pyambu

kuki ingyuo inyimungu karo rape rape lao kararami.

Dokopa nakamame namba Kamongo lao soo nyerami.

Dee mendeme nambame nyisareŋe lao isaro karara ramo doko mona  
maka nara, leya.

24 Nakamame ami yanda singinya yanda pimwai porainya pinji  
nyepala eparamo doko nyuo nembaramisi?

Dee gapomane koo porai mende keta nakamame wambu karapusi

lekeleke rao palaminyi dupwa mee kapa kiiramo moko nyeramisi?

25 Kamongo dokome isingi lao,

Doo leto doko nambame pirowaleŋe.

Yanda singinya karapusi wambu palyarami dupwa nyuo lanyuo pao  
dee yanda singimi yanda pimwainya pinji bange nyuo soo parami.

Dupwa nyuo nembo pipala mendeme nakama pyalana piramo doko  
nambame yanda pimwaiyuo pyalana pyuo

nakamana wane wanakepe dupwa kiiramo nyakaro.

26 Nambame nakama pyalana piraminyi wambu dupwa yango sukusa  
range pyao kumasinya lao piru.

Wambu ipwa biya napala kopyali kyakaenge doko suu pyao

nakamame wambu yango mende pyao kumako imbu singi andake  
manjo kararami.

Dokopa wambu rara peparae dupwame namba Kamongo

nakama kyawa lete nyuo kiiramo nyii doko lamo lao soo nyerami.

Nakamame namba Isaraele wambunya porai reŋe palenge Anatu  
doko lamo lao soo nyuo pirami.

**50** <sup>1</sup> Kamongo dokome lao  
Nakamame suu pyaminyi dokopa akalimi enda ramanyi  
nembenge dopale ingyuo

nambame nambana wambu dupwa neta ramanyi nembo kaeŋe lao  
suu pilyamisi?

Dopa pyuo suu pyarami ramo ramanyi nembelyo lao pepa piyunu  
angi doko anja silyase?

Akali mendeme banya wane dupwa karapusi ingyuo yulu pyuo pena  
lao maiyuo kana nyingi dopale ingyuo

nambame nakama karapusi ingyuo pupwa lapala maiyuo bange  
 nyiiji lao suu pilyamisi?  
 Daa nakama karapusi ingyuo peyami doko nakama rangeme koo  
 pipala  
 lowa yalo piyaminyi dokona peyamisa piya.

- 2 Nambame nakama keta pao kyawa lete nyela peyo dokopa  
 nambana wambu akipamo namba keta epa nayamisi?  
 Nambame kee leyono dokopa nakamame akipamo isingi yaa lao  
 yano pyaa nayamisi?  
 Nambame nakama kapa pyuo nyiso kyawa lete nyero ingya nalyase?  
 Nambame ipwa kota pete kameya doko mee soko rali pinya lao  
 dee ipwa epo penge dupwa nyuo kee maro lanyi pyambuo soko  
 oma dupwana selamo dupwa mee ipwa nanapala kumuo parami  
 ingilyamo.
- 3 Wambu kumaminyi dokopa kumanda karo piso petengenyili pyuo  
 nambame yake doko iminjinyi pyambwaro.

#### **Kamongona Kendemande Akali Dokome Banya Pii Rape Rape Lao Pingi**

- 4 Kamongo Mupwa Andake Wakasa dokome namba pii apa pyuo laro  
 dupwa mana langiya.  
 Dopa pyuo langiyamo dokona nambame wambu makange dupwa  
 porainyi pyambuo laro ingiya.  
 Yangama peparae baame namba pii mana langiramo dupwana  
 namba nyuo wangu lakanyi pyambuo pipala mana pii langingi.
- 5 Kamongo dokome namba pii langiyamopa  
 nambame baa mona kana poko  
 yaki nyuo paa nayo.
- 6 Nambana matarena pinya lao yongo maiyuo kaeyo.  
 Nambana angasi dupwa minyuo ipyuo nyuo  
 lenge kambu kepakali kyasinyi piso  
 kilya kando laminyi dokopa kaena laowape laa nayo.
- 7 Kamongo Mupwa Andake Wakasa dokome namba nyiso karapyamo  
 dokome  
 nakamame namba kilya kando laminyi dokome nambana monarena  
 pyapyande daa.  
 Dopa pyuo lami dokona namba elya nyii naro doko soo kaepala  
 mee kyawame suu lao pupunu pilyamo.
- 8 Anatu dae repeta karamo dokome  
 namba keta koo mende pali nalyamo lao pano lara.  
 Mendeme namba kando koo piiji lao kote larase?

Dopa laramo wambu dokopa kote lambanale.

Banya pii angi palamo doko minyuo epena.

<sup>9</sup> Nambana Kamongo Mupwa Andake Wakasa dokome namba kyawa minyuo karenge.

Namba koo piiji lao lao pakana palyara doko apisi?

Nambapa yanda pyuo laraminyi dupwa dusa kata serandena pana narami ingilyamo.

Nakama komau pinjingi nakepasi dee kando nyii narami dopale ingilyamo.<sup>r</sup>

### Anatumi Jerusaleme Kyawa Minyuo Nyisara

**52** <sup>1</sup> Wambu Anatu suu pyaa nange dupwa Jerusalemena kame kambu doko dee yalo sukusa epa narami dokome Jerusaleme emba kandokondali pyuo dee porai ingyuo karape. Wambumi komau keyange wapungi doko suu pyao Anatunya yuu taone poo pyasi doko mondo lao elya pyuo sepe.

<sup>2</sup> Jerusaleme emba karapusi palenge kandapi doko sinjimu para para pyuo sipinyi doko pyarendanyi nembapala sipurapala kiņinya petenge isa dokona pisipi.

Yuu Sayone wambu karapusi pyao nyuo peyaminyi anjisi karaminyi dupwa mokwalapape.

<sup>3</sup> Kamongome banya wambu dupwa kando lamaiyuo lao, Kana mendeme nakama ropo pyao nyuo karapusi palyiyaminde daa. Dokona ingyuo nakama nyisa moko eparami lao kana reto nyeraminde daa.

<sup>4</sup> Nakama kata londe wambu ingyuo yuu Isipi dokona pao palyuo kareyami dokopa nakama range panya lao suu piyaminyili pyuo peyami. Dopa piyaminyipape Asiria wambu dupwame nakama suu lao lanyuo papala angi kanape mende reta nayami. <sup>5</sup> Eapu yuu Babilone dokona doo piyami dopako pyuo pilyaminyi. Nakama karapusi ingyuo nyuo papala bange mendepe nakama ropo pyao reta nayami. Wambu dupwame nakama iso karapala range mupwa ulipiliņi lao suu pyao nambana kingi pendewa nembo lao karaminyi. <sup>6</sup> Yuu gii ene eparamo dokopa namba Anatu dokome nakama langilyamo lao soo nyerami.<sup>s</sup>

<sup>7</sup> Waili pii minyuo papingi mende yuu kyau dorena piso waili pii keyange mona kyuu lao seramo doko lao epelyamo doko wambu raeme kumuo serami.

---

<sup>r</sup> 50:10–51:23 Anatumi banya wambu dupwa porainyi pyambu mona minyarambu pii lamaiya. Rengya nakama kyawa lete nyuo enenge inginyi pyambwakaro, Anatumi lalu lao leya. <sup>s</sup> 52:6 Yuu kyau dorena piso waili pii keyange mona kyuu laoseramo doko lao epelyamo. (52:7)

Baame epo anamasi minyarami lao yuu Sayone wambu dupwa kando lao,

Nakamana Anatu doko kiŋi ingyuo karamo, letamo.

8 Wambu lapo yuu taone doko iso karaminyi dupwa ama rae wakasa maiyuo pii poraiyuo letaminyi.

Kamongo kapu kyuo yuu Sayone dokona epelyamo doko nakamana lenge angi rangena dokome kandelyaminyi.

9 Kamongo dokome banya wambu dupwa mona minyarambu banya yuu taone doko kyawa lete nyeramo dokome Jerusaleme momo nao pasi doko raeme kumuo pii poraiyuo lape.

10 Kamongome banya porai reŋge poo pyasi dokome banya wambu lete wai pyao nyeramopa yuu muu peparaeme kandarami ingylyamo.

11 Nakama tembole anda dokona bange singi nyuo penge dupwa yuu Babilone yaki nyuo kandokondali pyuo ipupwape. Dopa pipala bange koo palenge dupwa minyandasaramano kando lao waso karo

nakama range poo pyasi ingyuo karapala yaki nyuo ipupwape.

12 Yuu gi dakepa doko nakama wanjamwali lapala puu pae lao epa nalapape.

Nakamana Kamongo Anatu dokome kata peparaena embena konambena mendeke ingyuo lanyuo papira ingylyamo.

#### Kendemande Akali Yasuko Nao Kareŋge Doko

13 Kamongo dokome lao,

Nambana kendemande dokome banya yulu dupwa peparaie kapa pira.

Baa mee mende ulipili ketae nembaraminyipa karara.

14 Wambu malumi baa kandeyami dokopa yamarangyuo mona nembeyami.

Banya yongo doko kiki pilya pyana pyuo kombe kwua kwua leyasa wambu lenge kambu nyii naya.

15 Dopa piyamopape epapu wambu rara malumi baa mupwa lao suu pyao yamarangyuo kandarami dokopa

kiŋi akali dupwame mona nembo pii lalana saka narami ingylyamo.

Dokopa nakama wambape dopale mende kando sepa nange doko kandapala soo nyerami.

**53**

<sup>1</sup> Dokopa wambu dupwame isingi lao,

Namwame kandapala letamano dokona apimi kinyilyamo lao soo nyera ingylyase?

- Dee dokona yulu dakena Kamongona porainya renge doko apimi kandara ingyase?
- 2 Kamongome suu piyamili pyuo isa wai mende yuu ketange pyasi mee dokona lee rao andengenyili pyuo banya kendemande akali doko poro lena leya. Wambumi epe kandaraminyi panda lakanda minya minya pingipi baa keta pali nana lao kareyamopa mendeme baa lengeme auwa kandarami ingyaya.
- 3 Namwame baa epe kanda nale nale lapala baa mata maiyuo kareyama. Baame randa dupwa epeyamopa yasu nao rando kareya. Dopa pyuo kareyamopa mendeme baa kandalana suu pyaa nayami. namwame baa mende daaŋa lao suu piyama.
- 4 Dopa pyuo ando peyamopape randa doo neyamo dupwa namwa neyamali. Baame randa nao kareyamo doko kandapala Anatumi baa keta randa mailyamo lao suu piyama.
- 5 Dopa pyuo peyamopape namwana koo pingi dupwana lao baa randa maiyuo pyaroko piyami. Baa yanenge poro lao randa niyamo dokome namwa pyuo lete nyiya.
- 6 Doko namwa peparaee mena sipisipi pana nange dopale ingyuo kareyama. Karapala namwa rangena suu piyamano kata dupwana iki pao kareyama. Dopa piyamopape namwa peparaeme koo piyamano randa nyerama ingiya doko Kamongo dokome baa keta kulimbua palena lao maiya.
- 7 Baa koo keta palyuo pyao lao randa maiyaminypape kambu lumbuo pii mendepe laa napala koo nono ingyuo elya kalo randa nyiya. Mena sipisipinya ikwane pyalana lanyuo penge dokopa kae laa nao penge panda sipisipi mendena emanji pyaki pilyaminypa sipisipi doko kae laa nao karenye doko suu pyao baa pii mende laa nao kareya.
- 8 Baa minyaro nyepala pii piso soo kote leyami. Kote lapala baa lanyuo pyao kumakala peyami. Dokopa mendeme baa doo randa nyera dokona mendeme pii palyuo lakaminyaa suu pyaa nayami.

Baa namwana wambunya koo dupwana lao  
reke lao pyao kumakayami.

<sup>9</sup> Baa lowa mende yalope  
pii kyambo mende laope pii nayamopape  
baa koo pingi wambu pipya role pyao malu piyami.  
Baa akali kamongona panda dokona malu piyamiko.

<sup>10</sup> Kamongome lao,  
Nambame baa randa nyuo yasu napyali lao suu piyu dokona randa  
nyiya.  
Dopa pyuo baa kumuyamo dokopa mena pyao kiso maingi dopale  
ingyuo wambunya koo dupwa kame soo kaeyasi siya.  
Dokona lao baame banya para pyasi wambu dupwa range kando nyera.  
Baa yuu gii londe andarele karara.  
Dokopa baa kumaramo renge doko nambana yulu dupwa jingi lyuo  
kapa palyuo para.

<sup>11</sup> Baa randa yasupi naparamo dokopa enakana baa rae maingi renge  
dee kamba nyera.  
Baa doo randa naramo dupwa mee male male lao randa neyolyamo  
lao suu pyaa nara.  
Nambana kendemande dokome namba mona retenge doko kando  
namba rae maingi.

Baame peparaena koo dupwana randa nyeramopa  
banya lao nambame nakamana koo dupwa kame sakamiru.

<sup>12</sup> Dopa pyuo paramopa nambame baa ketae pyambuo  
baa akali kamame wakasa porai dupwa pipya karena laro.  
Wambu koo pingi dupwana panda nyuo randa nao  
baa range kumuo mainya mona kumapala  
baame wambu koo pingi malunya panda nyepala  
ateņa lao Anatumi nakamana koo dupwa kame sakaminya lamaiyuo  
kumuya.

#### Kamongome Isaraele Wambu Dupwana Lao Mona Reteya

**54** <sup>1</sup> Jerusaleme emba enda ingi porailyamo wane manja nao  
petenge dopale ingilyamo kareng doko  
raeme kumuo kenane ketae palyuo karape.  
Renge doko enda akalingimi yaki nyuo peyamopa baa wane malu  
manjiramopa

akali role pingi dokome wane mendasipa iki manjira.

<sup>2</sup> Emba palirene komau anda doko andake ingyuo piri.  
Pipala puu doko kaka soo pyuo pee lao pyasinju lape. Pinjingi  
isakulimi dupwa poraiyuo pimba pyare.

- 3 Embena yuu paki pakipi peparaena liti doko yuu neta yalele lao  
 konda pyuo nyuo kalyape.  
 Dokopa wambu rara lapome dakepa yuu nao palaminyi dupwa  
 embena wambu dupwame nyerami.  
 Yuu taone apa silyamo dupwa dee wambumi palyuo kete pyarami.
- 4 Emba dee kamba elya nyii nare ingilyamo dokona pakame kumuo  
 kara napipi.  
 Dee mendeme emba nyuo isa palya narami.  
 Enda akalingi kanda soo nyepala yulu mondo lao pii napala elya  
 nyuo petengenyili pyuo petee kande dopako pyuo parende daa.  
 Enda waiya ingyuo kale paka paka leyamo peteene kande dokona  
 kame sere.
- 5 Bange peparaee pyuo wasiyamo doko embena akalingi mendeke  
 ingyuo karara.  
 Dokona lao Kamongo Porai Wakasa letamano doko banya kingi  
 dokosa lenge.  
 Isaraele wambunya Anatu poo pyasi dokome nakama nyiso kyawa  
 lete nyera.  
 Doko baa yuu muu peparaena mupwa ingyuo karamo.
- 6 Isaraele emba enda mapwae  
 akalingimi role pyaa nalyamosa randa nyingi dopale ingilyamo.  
 Dopa pipyamopape Kamongome emba range kapu kyuo ipu lao kee  
 lapala lao,
- 7 Yuu mange kuki lama nakama mee yaki nyuo kaeyapunu pipyaŋa.  
 Dee nambame mona andake retapunu dokome range nyero.
- 8 Namba imbwayo dokona yuu gii kuki lama nakama mata jiyu.  
 Dopa piyunupape nambame nambana mona retenge renge doko  
 lasaka pyuo karalu kararo, lao  
 Kamongo emba pyuo nyilyamo dokome letamo.
- 9 Wamba Noa kareyamo dokopa  
 ipwame piyunu dopaleme mende pii naro lao lalu lao leyo.  
 Dee epapu nakama kando imbu singi manja nao  
 dee koo dupwana kando nakama koo pinginji laope randa jii narona  
 lao lao lalu lao leto.
- 10 Yuu kyau kuki andakepe dupwa poro lao para.  
 Dopa piramopape nambame nakama mona retelyo doko ota nalu  
 nara.  
 Nakama keta mona kyuu lao seranŋa lao lao kana minyuo leto pii  
 doko minyaro.  
 Kamongo nakama mona retelyamo dokome dopa letamo.

## Jerusaleme Enenge

<sup>11</sup> Kamongome dopa letamo.

O Jerusaleme taone randako nyingi kapa mende piri ingya nange dake.

Emba mendemepe mona minyarambwa narami ingilyamo.

Dokona lao nambame kana bange nyingi rungi rungi pingi dupwame nakamana isa susa reto dee kamba wasakaro.

<sup>12</sup> Dopa pipala namba nakamana anda ketae londe dupwa kana kone keyange dupwame pyakapala

dee nakamana kame kambu dupwa kana isare ingyuo rao kui kui lasi dopaleme pyakao

dee kana kame awali lao palenge doko kana golome wasisi

wambumi nyuo kinginya piso kalya pingi bange dokoreme pyakao piru ingilyamo.

<sup>13</sup> Namba rangeme embena wambu dupwa mana lamaikapala mona seramopa yulu peparaena kapa palyuo pena lao piru.

<sup>14</sup> Rolaena renge dokome emba porainyi pyambwara.

Mojo emba keta peyo lengepe paka rengepe dupwana emba kyawa minyaramo karare.

<sup>15</sup> Mendeme emba nyuo kuinya palyuo pyalana piramo doko

Nambame suu pyaa naro dokona rangeme suu pilyu ote lao pira.

Mendeme baa emba yanda pimwaiyuo kararamo doko isa para ingilyamo.

<sup>16</sup> Nambame yanda kakupi isareme kiso poraiyuo wasingi akali doko nambame akali dopale inginyi pyambuyu.

Nambame dopako pyuo ami dupwame yanda kakupi wasisi dupwa nyepala wambu pyao kumakala penge doko

inginyi pyambuyu.

<sup>17</sup> Dopa pyuo piyunu kaku dokona mendeme emba keta yalya nara lyakande.

Emba koo keta palyuo larami dupwa lao rolakamyuo karare.

Nambana kendemande dupwa arapunya palyuo reto kararonopa nakamana yanda pimwai anamasi minyuo kararami,

pii doko Kamongome letamo.

## Anatunya Sakame Kumungi Renge Doko Wambu Keta Palamo

**55** <sup>1</sup> Kamongome lamaiyuo,  
Wambu peparae nano karengi dupwa  
dae ipwa silyamo dokona ipupwa.



- Kana dalyamo dupwa  
 palawa ropo pyao nala ipupwa.  
 Ipwa waene susupi dupwa  
 mee pakiki nyuo nala ipupwape.
- 2 Nenge sikya pii nara dokona akipamo kana nembo nelyamisi?  
 Akipamo embena pee nyingi kana dokome nembo ropo pyao  
 napapinyipape mee lopoko karese?  
 Nambame laro doko sepala dokome moko minyuo piri dokome  
 nenge doloma nyuo isa palyuo rae maiyuo nengende nare.
- 3 Nambana wambu dupwa pii leto dakepa sepala namba keta ipupwape.  
 Dopa pyuo namba keta epo lete karengenge reнге nyerami.  
 Dokopa nambame kana minyuo lenge pii sulu sera mende  
 nambame Dapiti kando elyape keta pisaro lao lalu lao leyono dokona  
 elyape keta pisingi reнге doko nakama jeroko.
- 4 Nambame baa wambu rara peparaena akali kyawa ingyuo wasiyu.  
 Wasapala baa keta nambana porai reнге doko nakama lasaka piyu.
- 5 Dakepa nakamame yuu wakale range wambu dupwa epena lao  
 kyakale larami ingyamo.  
 Wamba wambu dupwame nakama see nayami kande.  
 Dopa piyaminypape epapu nakama karaminyi dokona makando ree  
 lao eparami ingyamo.  
 Namba nakamana Kamongo Anatu Isaraele wambunya Anatu poo  
 pyasi dokome  
 reнге dupwa pyaka sinya laro.  
 Nambame nakama kingi ketae pyambu rape rape lena lao piru.
- 6 Kamongo baa keta kapu kyuo papala atenja lalapape.  
 Dakepa baa nakama repeta epo karamo.
- 7 Wambu koo pilyaminyi dupwame nakamana yulu koo dupwa yaki  
 nyuo kaena.  
 Pipala nakamana suu pingi koo dupwa alowa pinya.  
 Nakama namwana Kamongo Anatu  
 sakame kumuo waiyuo lao nyuo kame sakamingi doko keta kapu  
 kyuo pena.
- 8 Kamongome lao, Namba suu pyao yulu pyuo nenge rambo lao pingi  
 dupwa  
 nakamana dopale daa, letamo.
- 9 Yake doko yuu dokona kamame yuu ketae ingyaro karamo doko suu  
 pyao  
 nambana suu pingipi yulu pingipi doko kamame ketaele wakasa  
 ingyamo.

- <sup>10</sup> Apu pipyaepe dolapo mee dasa piso imbu napala yake dokona piso lyuo epo ee yuupi ipwa pyao nenge andanyi pyambungi.  
Dolapome nenge jingi maiyuo dee kakana pyuo pilyunupa nenge. Nambana pii doko dopale ingyuo sipyamo pilyamo.
- <sup>11</sup> Dopa pyuo nambame mende pirunya lao retelyono doko mee isa paa nange.  
Angi letono dokonako kapa wai wara pyuo pipala pyuo otenge.
- <sup>12</sup> Nakama yuu Bapilone mona seramopa raeme kumuo yaki nyerami.  
Yuu kyau kuki andakepe nakama paraminyi kata dokona silyamo dupwame puli pyao kenane pyarami  
dee isa dupwame rae maiyuo pii ketae palyuo larami.
- <sup>13</sup> Saiperese isa dupwa nepereke mau panda koo dupwana andarami.  
Dee matele isa dupwa ikyaikya andenge dupwana poro lao andarami.  
Dopa piramo dokopa namba Kamongo dokome yulu andake piinj lao suu pyarami lao lasaka pili laro karalu karara.<sup>t</sup>

### Nenge Kinyi Angi Wasaka Pyuo Petenge

**58** <sup>1</sup>Kamongo dokome lao, Pii poraiyuo kaeyo lao nambana Isaraele wambu dupwana koo dupwana lao lamaipi, letamo. <sup>2</sup>Nakamame namba yuu peparae kingi wapambupi lakao kingi letaminyi. Lapala lao nakamame nambana yulu dupwa soo wangu lakao nambana mawa pii rape rape lao rolae dokona palyuo pimwali lao letaminyi. Lapala nambame nakama mawa pii rolae dupwa jipiliñi lao namba rae maiyuo lakandelyamano, letaminyi.

<sup>3</sup>Lapala wambu dupwame piso soo lao, Nenge wasaka pyuo pisaramano dokopa Kamongome kando gisa nara ramo doko akipamo wasaka piramase? Namwame nenge naa nao kararamano dokopa Kamongome mende suu pyaa nara ramo akipamo namwa dopa piramase?

Kamongome nakama lamaiyuo lao, Kinyi nakama nenge wasaka pilyaminyi. Piminyipape nakama rangena bange yulupi dupwana lao suu pyao nakamana yulu pingi wambu dupwa mona kendanyi pyambuo pilyaminyi. <sup>4</sup>Dopa pyuo nakamana nenge naa nao wasaka pyuo pisiminyi dokome laiya lao pyakando pyuo karaminyi. Dokona nakamame suu pyaminyi dokopa doo nenge wasaka

<sup>t</sup> 56:1–57:21 Pii renge wakale wakale palamo dupwa. Wambu dupwame Anatu yaki nyii nao baa laramuli pyuo mee pingi dokona lao palamo. Dee wambu dupwame Anatu yaki nyuo kata wakale penge dokona lao pii palamo. Dee Anatumi banya wambu dupwa nyiso pyuo nyero lao lalu lao leya.

pyuo petaminyi yulu dokome nambame nakamana atenja doko sakarene lao suu pilyamisi? <sup>5</sup>Nakama nenge wasaka piminyi gii dokopa nakama range randa nyuo rambi pau pyao kamba kamba paleyamuli pyuo ayemba rukyuo kumanda piso wapungi komau kwuayo pee lombo retapala ketae palaminyi. Doo pilyaminyi dopa pyuo nakamame nenge wasaka pilyamano lengese? Nakambame suu pyaminyi dokopa namba doko rae mairini lao suu pilyamisi?<sup>u</sup>

<sup>6</sup>Nambame nenge wasaka pyuo petenge yulu mende suu pilyu doko dake. Wambu lapo mona kendo randa nyilyaminyi dupwape dee wambu lapo nakamana yangome nakama kando rolae ingyuo pyakamyuo kara nalyaminyi dupwape kiiramo nyerami ingilyamo. <sup>7</sup>Wambu lopange dupwa nakamana nenge maiyuo andana pali nange dupwa nakamana andana palyuo dee komau aeya nalyamo karene dupwa komau wapunya lao maiyuo karo dokopa nakamana andare ree palu mendaki dupwa kaeya nao nyisarami ingilyamo.

<sup>8</sup>Dopa pirami dokopa nambame nakama kando epe kando yangamana neta lepo lepo pyuo nakama keta ranyi peenge dopale inginyi pisaro. Dopa piru dokopa nakamana yongo dupwana mendasa wua kakupi pisiramo dokopa waiya lao umbwa pinyi retakaro. Nambame yuu peparae nakama pipya role pyao karo kyawa lete nyuo kararo. Nambame dorena darena pyuo nakama konambe ingyuo alyasa minyaro. <sup>9</sup>Nakama atenja laraminyi dokopa nambame yano pyakaro. Dee nakamame namba kyakale laraminyi dokopa aopa nee lao sakaro.

Renge doko nakamame wambu randa maingi yulupi kingi sikisame suu lao koojo lao lengepe pii koo lengepe dupwa yaki nyuo kaepala <sup>10</sup>nakamame lopange wambu nenge maiyuo dee mende aeya naramo kararaminyi dupwa bange maiyuo kararami ramo dokopa nakama keta iminjapyamo karaminyi doko alowa pipala yango rali pira. <sup>11</sup>Dokopa yuu peparae nambame nakama bange keyange dupwame mende yangya naramo karamili lao joo kata angi lasaka pyuo kararo. Dopa pyuo dokopa nambame nakama yanenge reto porai ingyuo karalapa lao minyaro kararo. Dokopa nakama ee nenge ipwa apupi nyepala menya menya lao andenge dopale ingyuo kararami. Dee ipwa guu doko sokwa nao epo karene dopale ingyuo palyuo karo pirami. <sup>12</sup>Dokopa nakamana wambu dupwame anda wamba kwaeyasi silyamo dupwa karene panda dokonako dee pirami. Dokopa nakama kana kame awali lao kamba pyuo dee anda momo nao lalyuo pasi doko kamba karengenyili pyuo piyaminyi dupwana lao kingi larami.

### **Koro Petenge Yuu Gii Doko Poraiyuo Suu Pyao Minyaro Karo Yano Nyerami**

<sup>13</sup>Kamongo dokome lao, Nambana koro petenge yuu gii doko poo pyasini lao suu pyapala rangena rae maiyaraminyili pyuo yuu gii dokona

<sup>u</sup> 58:5 Nambame nenge wasaka pyuo petenge yulu mende suu pilyu doko dake. (58:6-7)

pii nalapape. Nambana yuu gii doko rape rape lao karo kata papyuope yulu pyuope pii kopetame laope kara narami ramo <sup>14</sup>nambana yulu pyakarami dokona rae maingi renge eparamo kando nyerami. Nambame nakamana kingi ketae pyambu yuu muu dupwana uu lepa lepa pena laronopa yuu nambame nakamana kauwane Jekope keta maiyuno dokona kapa rae maiyuo nao palirami lao namba Kamongo dokome lapunu pilyamo.<sup>v</sup>

### Jerusaleme Rengya Elyape Ingyuo Sera Doko

**60** <sup>1</sup>Jerusaleme emba epapu eja nembo neta dopale ingyuo rao sipurape.

Dokopa Kamongome banya neta renge yulu doko nakama keta ranyi pisilyamo.

<sup>2</sup>Yuu muu liti wakale wakale dupwa iminjingi dokome yambe pyaramo kararami.

Dopa piramopape Kamongona neta renge dokome nakama keta yanga paupau lao rao karara.

Dopa pyuo banya eja penge renge doko nakama keta palira.

<sup>3</sup>Dokopa wambu rara wakale dupwa nakamana yanga paupau lenge dokona eparami.

Dee kiŋi dupwa nakamana yuu gii enenge yangaramo dokona eparami.

<sup>4</sup>Nakama lenge pendekae lapala apa pilyape lao kandalapape.

Nakamana wambu dupwa anda epena lao malu palyuo karaminyi. Nakama ikinyingi dupwa yuu nanesa piso eparaminyipa nakamana wanenge dupwa wane wanakepe nyaŋa ingyuo wambu wakale dupwame apu soo eparami.

<sup>5</sup>Nakama doko kandapala rae wakasa maiyuo kararami.

Dopa pyuo kando mona pulunongo pyao kararami.

Wambu rara dupwana kamongonge bange dupwa ipwa kota dupwa yalo nakamana lao minyakao eparami.<sup>w</sup>

<sup>6</sup>Yuu Mitiane Epape dolapona piso mena kamele malu suku piro karo eparami.

Dopa piraminyipa mena kamele lapo yuu Sipa dorena karo kana golope rendamu pingi bangepe minyuo eparami.

<sup>v</sup> 59:1-21 Poropeta alkali dokome wambumi koo piyaminyi doko kando leya. Leyamopa nakamana koo dupwa polo leyami. Kamongo dokome rapa rapa pipala wambu dupwa nyisapuli yaka lao suu pyao lete wai pyao nyero lao lalu lao leyamo pii palamo.

<sup>w</sup> 60:5 Mena kamele malu suku piro karo eparami. (60:6)

- Dokopa Kamongome yulu keyange pipyaŋa lao wambu dupwame waili pii doko larami.
- 7 Yuu Keta Nepayotepena mena sipisipi peparae nakamame pyao kiso mairamiŋi lao minyuo eparami. Doo minyuo eparaminyi dupwa kana pyare lasi dokona pyao kiso maiyuo Kamongo rae mainyi pyambwarami. Doko Kamongo dokome banya tembole anda doko kamame wakasa ingyuo neta ranyi retara.
- 8 Ipwa sipu dupwa kopa isa isa puu pae lao epamuli pyuopee dee yaka waiyamu waiya lao bii lao anda epamuli pyuo eplyaminyi dupwa aki lapose?
- 9 Sipu dupwame yuu nanesa piso Anatunya wambu dupwa range anda lanyuo imisa pilyamo. Kamongo dokona kingi ketae pyambu karena lao nakamame kana kulingipi kana golope dupwa minyuo eplyaminyi. Kamongo doo yuu muu peparana wambu dupwame banya wambu dupwa ketae pyambu karena lao pilyamo doko Israele wambunya Anatu poo pyasi ingyuo karamo.
- 10 Kamongo dokome Jerusaleme kando dopa letamo. Wambu yuu wakale range dupwame nakamana kana kame awali lao doko dee kamba pyakarami. Dokopa wambu dupwana kiŋi dupwame nakamana yulu pyakarami. Nambana imbu singi dokome nakama randa jiyu. Dopa piyunupape dakepa nambame nakama epe kando sakame kumuo kararo.<sup>x</sup>
- 11 Dokopa kukwa korakamape dupwana nakamana kame kambu dupwa lumbasi sera. Seramo dokopa yuu muu dupwana kiŋi dupwame nakamana kamongonge bange dupwa minyakao epo kararami.
- 12 Dopa piraminyipa wambu yuu liti lapome nakamana yulu pyaka narami dupwa pyao kokwa soo nembalu nembo nembaro.
- 13 Dopa pirunupa isa rara wakale wakale dupwamepe dee yuu Lapanone imwa dokona isa keyange dupwamepe minyuo epo yuu Jerusaleme dee kamba wasarami. Doo minyuo eparami dokome nambana tembole anda doko au pinya lao pyuo

---

<sup>x</sup> 60:10 Ipwa sipu dupwa aki lapose? (60:8)

nambana taone andake doko netaja rao lepo lepo pyuo karena lao wasarami.

14 Akali nakama randa joo kareyaminyi dupwana ikinyingi dupwame epo

nakama mee mende ulipili ingyuo karaminyi karamano lao lasaka pyuo pangu serami.

Wambu nakama angi mende daaja lao suu piyaminyi dupwame epo nakamana kimbu seramo dokona piso nakama lakando lao

Kamongona yuu taone andake, larami.

Lao dokopa, Isaraele wambunya Anatu poo pyasi dokona taone Sayone lenge, larami.

15 Dokopa nakama epe kanda naope yaki nyuo kame soope pii narami.

Dopa piraminyipa yuu taone andake yaki nyuo kaelyaminyi apa soo wambu pali nalyaminyi singi dopale ingyuo see nara.

Nambame nakama andake ingyuo au wakasa pyuo yuu rae maiyuo karalu karenginginyi pyambwaro.

16 Dokopa endangimi dokome banya wane rapu pinginyili pyuo

wambu rara dupwamepe kiñi dupwamepe nakama rapu pirami.

Dokopa namba Kamongo Isaraele wambunya Anatu porai dokome nakama kyawa lete nyuo kiiramo nyiilyamo lao serami.

17 Nambame kone kana jepenge doko suu pyao kana golo jero.

Dee anepe isape jepenge doko suu pyao kana kulingipi kone kanape jero.

Jepala mee kana jepenge doko kaepala ane jero.

Dokopa nakamana akali mupwa dupwame randa joo kopetame rapu pii narami.

Nambame nakama mona seramo rolae pyuo iso karena lao piru.

18 Yanda pelana suu pyao yanda lakange pii dopale mendepe see narami.

Nakamana yuu doko dee pyao kokwa soo minjuku minyinyi namba narami.

Nambame nakama konambe mendeke ingyuo kame pyuo minyaro.

Dopa pyuo kyawa lete nyerono dokona lao nakamame namba lakandarami ingyuo.

19 Dopa piramopape kukwa korakamape

nakamana neta dee kanape renge panda dokona

namba Kamongo doko nakamana yanga paupau lenge kulisa ingyuo rao karalu kararo.

Nambana neta renge dokona yanga paupau lenge doko nakama keta ranyi peyara.

- 20 Nakamana mona rando ee lenge yuu gii dusipa lumwa pira.  
Dokopa namba Kamongo doko kendali ingyuo  
neta kanape dolapo yalaponalu rao sulu sero.
- 21 Dokopa nakamana wambu dupwame rolae doko anjuku lao pyuo  
yuu doko nyuo palu palirami.  
Nambana yulu andake dupwa nakama keta lasaka pyuo panaro lao  
nambame nakama nyuo pingi pyao wara pipala wasiyu.
- 22 Dee nakamana ree palu kamame kukilipi inyimungu karengepe  
dupwa  
rara andake porai renge palenge dopale ingyuo palirami.  
Dokona yuu gii rolae doko eparamo dokopa  
doo leto dake waiya lao pyaka sinya laro.  
Namba Kamongo dokome leto.

### Kiiramo Nyingi Waili Pii Doko

- 61** <sup>1</sup> Kamongo Mupwa Andake Wakasa dokome banya imambu doko  
namba keta palyuo simbwapya.  
Baame wambu pendewa dupwa waili pii keyange doko  
boo pyao lamaiyuo karape lao namba rombo palyapya.  
Mona yanyi pyapyamo karaminyi dupwa pyuo nyuo  
puu maisi karaminyi dupwa moko nyuo  
wambu isare rapyamo karaminyi dupwa mokwala pupi lapyasa epelyo.
- <sup>2</sup> Kamongome banya wambu lete wai pyao nyuo  
nakamana yanda pimwai dupwa anamasi minyara  
ee kana pyaka seramo yuu gii doko  
boo pyala pupi lapyasa epelyo leya.  
Dee wambu lapo ee lao kumanda petaminyi dupwa mona  
minyarambu puu lao peyapyasa epelyo.
- <sup>3</sup> Lapala lao wambu lapo yuu Sayone dokona kumanda petaminyi dupwa  
mona rando kondange doko suu pyao rae maingi renge maiyuo  
dee kumanda piso ee lenge doko suu pyao lakandenge kenane  
maiyo puu lapyasa epelyo.  
Nakama Kamongo rangeme isa wara pilyamo andenge dopale  
ingyarami.  
Dokopa nakama peparaeme yulu rolae doko anjuku lao pirami.  
Dokopa Anatu baame yulu piyamo dupwana lao baa lakandarami  
ingyara.
- <sup>4</sup> Nakamame yuu taone lalyuo kwaeyasi dupwa dee kamba minyalyuo  
pirami.
- <sup>5</sup> Nambana wambu dupwa yuu wakale range wambu dupwame epo  
yulu pyakao kararami.

Nakamana mena sipisipi dupwa rapu pyakao  
nakamana yuu dupwana yulu pyakao ee nengepe wara pyuo isa  
girapo ee dupwa mondo lao rapu pyakao pirami.

6 Dokopa nakama Kamongona purisi akali ingyuo karaminyi laope  
Anatunya kendemande akali karo pilyaminyi lao wambu menge  
dupwame soo nyerami.

Dokopa wambu rara yuu muu dupwana kamongonge bange  
dupwame nakama ketae palyuo karo rae mairami.

Rae maipala dupwa peparae nakamanana lao yongo nyimbwaramo  
kararami.

7 Nakamana elya nyuo karengi doko mee otara.

Nakamana yuu muru range dokona paliraminyipa  
mena bangepe dupwa mee lama opetaeli konda pyuo seramo  
kararami.

Dopa piraminyipa nakamana rae maingi renge doko soo puu para.

8 Kamongo dokome lao,

Namba kyai rolaepena anjuku lao lao rolengi yulu mona nyepala  
wambu randa maingi yulupi yulu kopetame pingipi epe kanda  
nage.

Nambame nambana wambu dupwa yaki nyii nao nakama kingi kiso  
maiyo

nakama pipya kana minyuo lalu lao lenge pii ingyuo laro.

9 Nakamana kingi doko yuu muu dupwana ulepalepa paramopa  
wambu kando serami.

Wambu peparae dupwana mendeme nakama kandapala dokopa  
nambame keyange inginyi pyambuyalyamo lao soo gisarami.

10 Jerusaleme enda mapwaeme akali anda panya kalya pipala penge  
dopale ingilyamo doko

Kamongome dopa pyuonde pyakapya lao kenane pyao rae maiyo  
karengi.

Anatumi baa anamasi minyungi regepe lete pyuo nyingi regepe  
dolapome kalya pipala pisapyasa pilyamo.

11 Ee dokona wara pingi dokopa waingi dupwa poro lamu lae pipala  
andengenyili pyuo

Kamongo Mupwa Andake Wakasa dokome banya wambu dupwa  
kyawa lete nyuo nyisara.

Dokopa wambu yuu muu peparame baa lakandarami.<sup>y</sup>

<sup>y</sup> 62:1-12 Yuu gii ene eparamopa Anatumi banya wambu dupwa lete wai pyao nyeramo  
dokona lao pii leyamo palamo.



### Anatumi Yuu Muu Dupwa Nyuo Kongwanyi Palyiya

**63** <sup>1</sup>Yuu Itome dokona yuu taone Bosera lenge dokona piso epelyamo doko baa apisi? Porainya renge palenge porai wakasa mende kimbu pyao piso komau kone keyange pinginde epelyamo doko baa apisi?

Doko Kamongo banya porai renge palenge dokome lete wai pyao nyingi dokome banya pyao anamasi minyngi renge dokona lao boo pyao lala epelyamo.

<sup>2</sup>Akipamo banya komau doko alemakai pyao kingyuo karami ingyuo kone wakasa pilyape? leya.

<sup>3</sup>Kamongome isingi lao, Nambame yuu muunya wambu rara peparae alemakai minyuo kingili lao kalyuo injo rambetaku piyuno dokopa mendemepe epo namba nyisa nayami. Dopa pyuo nambana imbu singi paleta nakama kalyuo injo rambetaku piyunusa nakamana ranjama dokome nambana komau peparaena alemakai kii ingyuo kaeyo nyiya.

<sup>4</sup>Nambana wambu lete wai pyao nyerono yuu gii doko ipwamo lao soo manjo oteyo. Gii dokopa nakamana yanda pimwai dupwa pyao randa mairu doko pyaka sepelyamo lao soo nyiyu. <sup>5</sup>Nambame kandeyo dokopa mendalimipi nyisaramaja lao ingya nayamisa mona nembo kareyo. Dopa piyunupape nambana imbu singi andake dokome namba porainyi pyambuyasa namba rangeme pyao anamasi miniyu. <sup>6</sup>Nambana imbu singi dokome yuu muu peparaena wambu dupwa pyao inji ranji pyuo minyuo alemakai kingili lany nembeyo. Nambame nakamana lete ranjama doko kulimbwany isa yuu dokona nembeyo.

### Anatumi Isaraele Wambu Dupwa Keta Keyange Pyakamiya

<sup>7</sup>Nambame Kamongona mona reto puu penge dokona lamairu.

Nambame namwana lao yulu peparae pyakalyamo dokona lao banya kingi lakandaro.

Banya mona retalu reto retenge regepe sakame kumuo nyisingi regepe dokome

Isaraele wambu dupwa elyape keta piso nyisiya.

<sup>8</sup>Kamongo dokome lao, Nakama nambana wambu. Namba minyako pii narami, leya. Dopa lapala baame nakamana randa dupwana kyawa lete nyiya. <sup>9</sup>Doko anala mendeme nakama nyiso kyawa lete nyiyande daa. Kamongo baa rangeme nakama nyiso kyawa lete nyiya. Banya mona reto kondange renge dokome nakama kiiramo nyiya. Wamba dokopa baame nakama yuu peparae au pyuo rapu pyakamiya. <sup>10</sup>Dopa piyamopape nakamame baa kando mata maipala mona randanyi pyambuyami. Dopa piyamisa Kamongo doko nakamana yanda pimwai ingyuo papala nakama yanda piya.

<sup>11</sup>Dopa piyamosa wambana Kamongona kendemande Mosese kareyamo doko suu pyapala piso soo lao, Wamba Isaraele wambunya Kamongo dokome Isaraele wambunya lita dupwa kota pete dokona kyawa lete nyisiyamo doko epapu anja karase? leyami. Akali Mosese keta banya Imambu Poo Pyasi maiyamo Kamongo doko epapu anja karase? leyami. <sup>12</sup>Kamongo banya porai renge dokome nyepala Mosese keta yulu andake piya. Wambu dupwame baa rangena kingi minyalyuo karalu kararami lao baame ipwa kota doko pyao karalyapala sukusa dokona lanyuo peyamo Kamongo doko anja karase?

<sup>13</sup>Kamongome kata lanyuo epeyamo dokome nakama kimbu rukyuope lukumu soope pii nayami. <sup>14</sup>Mena bulamakao yuu anda lama lama anenge andengena lanyuo pao lasaka pinginyili pyuo Kamongo dokome banya wambu dupwa mata sisiki nembena lao lanyuo pao panda doko maiya. Dopa pyuo Kamongome banya wambu dupwa lanyuo epeyamosa banya kingi ketae paleya.

### Sakame Kumuo Pyuo Nyisinya Lao Ateja Leyami

<sup>15</sup>Kamongo embena yake panda poo pyasi neta renge yuu dokona palyuo karene dokona karo namwa kandanyi peyo kandape. Embena namwa poraiyuo suu pingi doko anja silyase? Embena porai renge doko anja silyase? Embame namwa mona reto kondange renge doko anja silyase? Namwa pipya kandeke kanda nale laa napipi. <sup>16</sup>Emba doko namwana rakange angi. Namwana rora ambasu Aporakame Jekopepame namwa soo nyii nange. Dopa pimbinyipape emba Kamongo namwana rakange dokome yuu peparae namwa koo dupwana nenge raka lao nyuo karenge. <sup>17</sup>Akipamo embame namwa embena kata dupwana yaki nyuo ralo karalapa lao kaelese? Akipamo embame namwa yuu peparae mona kana pokalu poko pokapala yaki nyuo pumili lao pilisi? Wambu lapo embena yulu pyakalyaminyi dupwana lapolapo lao lapo yuu peparae embena ingyuo peyaminyi dupwana lapolapo lao kapu kyuo ipupi.

<sup>18</sup>Namwa embena wambu poo pyasi dupwa namwana yanda pimwai dupwame pyao nyisa ralinyi nembeyaminyipa yuu gii lapo pisipeyama. Dee nakamame embena tembole anda poo pyasi doko pyao lalyuo kalyuo muu muu pinyi nembeyami. <sup>19</sup>Embame namwa iso kara nalenepa namwa embena wambu ingyuo pisi nangende ingyuo pelyamo.

**64** <sup>1</sup>Akipamo emba yake doko kanguo nyuo karalyapala isa lupyuo epa nalese? Dopa piri ramo yuu kyau dupwa emba kandapala walu lao paka renge nyerami. <sup>2</sup>Dokopa nakama pengena ipwa pisapala isare kisilyaminyipa rao bolo pinginyili pyuo walu walu larami ingilyamo. Emba epo embena wambu nyisu petenge dupwa keta embena porai renge doko panembena lasaka pepe. Lasaka pipala yuu liti wambu dupwa embena lenge kambu dokona epo walu walu lao karena lao pepe.

<sup>3</sup>Embame yuu mendepa epo wambu yamarangyuo pakaramilinde piri lao see nayama dupwa pyaka soo piinyisa yuu kyau emba kandeyaminyi dupwame embapa pakame kumuo walu walu leyami kande. <sup>4</sup>Wambu Anatu embapa karo mende pirandelyamo lao soo manji nyisi karaminyi dupwa keta yulu andake pyakamingipya. Dokona Anatu emba yale mende karelyamo soo dee kando nyuowape pipa nangepya. <sup>5</sup>Wambu rolae doko anjuku lao soo nyuo rae maiyuo pingi dupwa embame yako lao nyingi. Embame nakama apa pyuo piso karo pimili lao suu pilini dokona palyuo pyuo petenge dupwa yako lao nyingipya. Embame namwa kando imbu singi nyipinyipape namwame koo doko pyuo puu pelyamano. Embame randa jelana imbu singi manjipinyipape wamba koo pyuo kareyaminyili pyuo namwa pyuoko pelyamano. <sup>6</sup>Namwa peparaeme koo pyuowako karamano. Namwana yulu rolae angi pilyamano lao pyuo pumwanopape yulu dupwanako peparae karo piso koo ingyuo pelyamo. Namwana koo dokome namwa mee isa porakana yao ingyuo soo papiyamo karamano. <sup>7</sup>Mendemepe moname nyinyi nembo emba keta nyisapili lao atēja pyao epana lao suu pyapa nalyaminyi. Embame namwana koo dupwana namwa yaki nyuo kaeyalana embena lenge kambu doko namwa pipya nee piru karene.

<sup>8</sup>Dopa pilinyiko doŋo Kamongo emba namwana rakange. Namwa mee wara yuu komba awai dopale ingyuo karamano. Dee emba yuu dokome penge angi wasingi akali dopale ingyuo karene. Embame namwa pyuo wasii kande. <sup>9</sup>Dokona lao namwa pipya imbumi kuma napipi. Namwana koo dupwana minyaro karo moŋo joo karalu kararoŋo lao suu pyao kara napipi. Namwa embenako wambu petamano dokona sakame kumuoko karape. <sup>10</sup>Embena yuu taone poo pyasi dupwa yuu muiyane penda penda ingyuo silyamo. Jerusaleme doko apa yuu ingyuo momo nao pelyamo. <sup>11</sup>Namwa tembole anda poo pyasi au pinginde namwana rora ambasupimi embena kingi lao lakando kareyami kande doko isareme yango kokwa soo muku reteyami kande. Yuu pandape namwame mona nyingi kandale dupwa pyao kwaeyo nembasi silyamo. <sup>12</sup>Dokona lao Kamongo embame mende piroŋo lao suu pyaa napala mee kanaja karepe? Namwa randa nyingi dee kamame wakasa nyelapa lapala embame mende pyuo namwa nyisare ingya nalyase?

### Anatumi Baa Mata Maiyuo Rangena Kata Peyami Dupwa Koo Keta Palyiya

**65** <sup>1</sup>Kamongome nambana wambunya atēja pii doko sepala yano pyalana rapa rapa piro kareyonopape angi laa nayami letamo. Nakamame namba anja karene lao koto kandamilinya kareyonopa nakamame kotalana suu pyao kara nayami. Nambame dae karo lapala nyiso yano doko pyalana lao kareyonopape yuu liti andake range

karaminyi peparaeme atenja lao piso see nayami. <sup>2</sup>Nambame nambana wambu mona kana pokapala rangena suu pilyu ote lao rangena kata wapuo pelyaminyi dupwa yuu peparaee nyisarowale lao rapa rapa piru karenge. <sup>3</sup>Nakama elya pali napala namba imbu singi nyakao pyuowako karaminyi. Nakamame semango imambu suu pyapala mena yakape yaonge mare dupwana yao maiyuo karaminyi. Dopa pyuo dokopa loma soo semango yao maingi kana pyare lasi dupwana rendamu pingi dupwa kiso maiyuo karaminyi. <sup>4</sup>Yuu gii kukwa dokopa kananda yanyandape dupwana papyuo wambu kumasinya imambu dupwame ropaka epo kemali kongwalupi pyuo langiraminyi pimana lao sela pao karaminyi. Wambu dopale dupwame mena minjupi mena ipwangepe anatu ingyuo imambu bange wakale dupwa loma soo kuiyuo maiyaminyi dupwape nao papyuo pyuo karaminyi. <sup>5</sup>Dopa pingi wambu dupwame wambu menge kando lao, Namwa angi yapasi ingyuo karamwano pilyamono warendasaraminji repeta epa nalapape, letaminyi. Wambu dopa pilyaminyi dupwame nambana gyaa kata sisuku pyambwakaminyisa nambana imbu singi nakama keta palamo doko isare ingyuo rao kookana lokwasi lapala waiya lao awa awa pyuo otara ingya nalyamo.<sup>z</sup>

#### Yake Yuupi Enenge Ingyuo Wasara

<sup>17</sup>Kamongome dopa letamo. Nambame yake yuupi enenge ingyuo wasaronopa wambowana pingi dupwa dopale kandape panda dapale kandape lao suu pyaa narami, letamo. <sup>18</sup>Nambame pyuo wasakaro dokona lao rae maiyuo kenane pyao karalu kararami. Nambame Jerusaleme enengende wasarano dokona raeme kumungi renge iki simbwaro seramopa banya range wambu dupwa raeme kumarami. <sup>19</sup>Yuu enengepe dokona wambu dupwape kandarano dokopa namba range keta rae maingi renge palyuo simbwara. Yuu dokona ee lengepe dee mende pirasa nyisinya lao pisingipi mende see nara. <sup>20</sup>Wane wanakepe ene nyanasa dokopa kuma narami. Wambu peparaee palyuo karo emo kumungi kakapu kumarami. Wambu ee kana andete (100) nembo pisirami dupwa kandarami dokopa mapwae parangepeko lao kandarami. Ee kana andete (100) dusipa karapa nao wambo kanya pyapu lao kumarami ramo dokopa nambame nakama keta randa palena lapisa pilyamo larami. <sup>21</sup>Wambu dupwame anda pipala dokona nakama rangeko paliraminyipa wambu wakale mendeme panda nyakami narami. Wambu isa girapo ee wara pipala nakama rangeme jingi lyuo ipwa waene wasapala rae maiyuo naraminyipa mendeme nyakami naramiko. <sup>22</sup>Nambana wambu dupwa makwa isa ingyuo karo kuku pyaraminyipa nakama bange nyelana randa nao yulu andake piyami dupwa nyepala rae

<sup>z</sup> 65:6-16 Anatumi kote laope lete nyuoape lalu lao lenge pii laparae dae palamo.

maiyo minyo kararami. <sup>23</sup>Yulu pirami dupwa mona karo andaramopa nakamana wane wanakepe dupwa randa andake nyii narami. Nambame nakamape dee ene manjo para pyao paraminyi dupwape yuu gii ene eparamo dupwana elyape keta piso puu paro. <sup>24</sup>Dopa pyuowako dee nakama nambapa lao ene atēja lao otapa naraminyipa kanyasa isingi yano pyakamiru. <sup>25</sup>Yana suwa kararope sipisipi yakane dupwape nenge mendakinya narami. Mena laene dupwame bulamakao nenge rambi yanda dupwa nengenyili pyuo nao kararami. Kau dupwa wambu nalanako pinginyili pyuo paa napala anjiki pyuo serami. Sayone nambana yuu kyau poo pyasi dokona koo renge dee randa nyingi rengepe mende see nara.

### Kamongome Yuu Mure Lao Kote Soo Rolara

**66** <sup>1</sup>Kamongome lao, Yake doko nambana kiņinya isa petenge rate silyamo.

Isa yuu doko nambana kimbu kararo petenge. Anda apiyakale mende pyakaramisi? Yuu anjukundena namba palirusi? letamo. <sup>2</sup>Namba rangena kingi dokome yuu muu peparae pyuo wasiyu. Wambu lapome namba iki mupwa lao suu pyao pako warombo soo nakamana koo dupwa polo lao yaki nyepala inyimungu karengē dupwa kando namba epe soo karengē, letamo.<sup>a</sup>

---

<sup>a</sup> **66:3-24** Wambu Anatu rae mainyi pyambwa nao koo pyuo karengē dupwa Anatumi randa maira. Dee wambu Anatu andake lao suu pyao pako karo baa warombo seraminyi dupwa elyape keta pisara. Pii dolapo dakena pyasi palamo.